



東京大学総合図書館所蔵



80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

C40-4514

了翁上座請大藏及有  
家普置之武州紫雲山  
我微參諸院直府中永  
為學者不敢許出院內  
當山二世鐵牛機譯



B 64853

古尊宿語錄卷第三十一

舒州龍門佛眼和尚小叅語錄

住南康雲居嗣法善悟編

三藏

藏

小叅云好一轉語還有人答得麼良久云問答俱備  
所以古人道夫說法者當如法說且如法又作麼生  
說諸人旣無風起浪者裏不免將無作有所以道其  
說法者無說無示其聽法者無聽無聞諸人旣無聽  
而聽我者裏無說而說若得恁麼目前無一法可得  
何故且聽外無一絲毫說底說外無一絲毫聽底便  
能透過雙關俱無異相不必說與不說聽與不聽自

然大地山河色空明暗更非別法可謂透出塵勞頓  
居實地雖現在三界中熾然出三界現在聲色裏熾  
然出聲色且如今與諸人說聽同時作麼生說箇不  
說不聽底道理須知端的明悟始得不見古人道非  
色聲香味觸法者箇去處也大殺不易叅學之士若  
非到此田地管取目前有法外旣有法內必有心內  
外緣生汨沒三界諸聖由茲而出現達磨特地而西  
來還知諸聖用心處麼祇是諸人心是更無別心亦  
無別法所以道十方薄伽梵一路涅槃門誠實無差  
方知道無迷無悟非聖非凡若實得恁麼便好韜光

晦跡履踐諸聖玄塗其或未然直須管帶始得不見  
趙州和尚云十二時中許你一時外學僧便問許一  
時外學未審學什麼州云學佛學法祇如佛法尚爲  
如今與諸人相會喚作非時言論旣是非時言論如  
何得相親去達道之人若能鎔鉛盤釵釧作一金攬  
酥酪醍醐爲一味說什麼時與不時盡皆中的奉勸  
諸人快好究取二六時中去離塵緣莫起異念豈不  
聞昔日有人在高樓上見二比丘從樓前過有二鬼  
使掃併道路復有二鬼散花隨後及乎二比丘廻次

二鬼復在前叱喝噀唾二鬼隨後掃除脚迹其人遂下樓問二比丘所以其二方悔感悟乃云我等去時共談佛理及至廻時却言雜語諸禪德此雖龕境界子細推來乃是學道之人大事何故祇爲情念譬如外境現前念若不生無境可得所以先聖道以無念爲宗而今但無凡聖異念種種心量亦無煩惱可斷亦無菩提可求於生無生於死無死不見昔日洞山和尚與密師伯游山次忽見白鬼從草中突出密云大似白衣拜相山云老大大作者箇語話密云兄又作麼生山云積代簪纓暫時落魄者箇公案如良久云討甚冤子珎重

何消遣得去且道是何道理諸人若會得白衣拜相便乃獨步丹霄永出常流若會得積代簪纓便解奪飢人之食祛耕夫之牛還悉悉麼直饒一一悉分明諸人分上總使不着如何是諸人分上事試斷看良久云討甚冤子珎重

師還東山省覲衆請小參云暫下蓮峯輕屈指光陰倏爾又三年雖然不隔絲毫許爭似躬親到座前某伏自數日前陪從太平禪師象馭再登蓮嶠歸侍老師大和尚瞻禮慈容之間須知有相見底事敢問大衆作麼生是相見底事不可是你見我我見你是相

見若恁麼全無佛法得力處何故世間諸趣彼此見存常在生死之中未有脫離之地所以雪峯和尚向人道望州亭與你相見了也烏石嶺與你相見了也僧堂前與你相見了也若據如斯指示豈待音容相接言氣相交始爲相見諸高德夫爲叅學之士須實有去處始得還知麼如今敢道千里同風相見却易會對面相見却難知何故難知夾山老子道目前無闍梨座上無老僧諸來大衆盡在于此如何見得日前無闍梨堂上老師大和尚在座與諸大衆證明作麼生見座上無老僧不可等閑過却將爲閑事晝夜

被見聞風所飄鼓根塵陰界諸入纏縛不得自由生死事大須得箇悟由入頭處始得雖然如是格外道人實遭怪笑何故須知有向上一着且待異日他時別爲諸人點破因記得昔日南泉趙州二尊宿皆是道超物外名播寰中時有一僧往山中見一禪伯在盤陀石上卓庵而坐僧遂問曰南泉出世浩浩地何不往彼問訊空坐何爲庵主曰莫道南泉出世佛出世我亦不去僧持此語見南泉南泉大驚遂令趙州往驗看州到庵主處從東過西庵主不顧州又從西過東庵主亦不顧州遂當門立曰庵主你敗也庵主

亦不顧遂拽下簾子而行庵主亦不顧大衆者一則  
因緣諸人作麼生委悉莫是趙州南泉不到庵主田  
地返被庵主勘破落他陷虎之機也無莫是庵主雖  
然並無受用臨機不解互換平地上死人也無諸仁  
者素非此理大凡行脚人須是道眼分眞始得若道  
眼不明祇被南泉趙州庵主三人換却眼睛了也實  
無少許相應處若也道眼分眞南泉趙州庵主便是  
上座更無異見也還相肯諾也無不見道曾經大海  
休誇水喫却須彌總是塵久立

解夏夜小參云一二三無言童子口喃喃三二一上

下四維無等匹衲僧活計絕絲毫萬古微猷是今日  
大衆作麼生是今日事現定東西僧俗燈燭熒煌作  
麼生見得箇絕絲毫底事若於此見得歷劫孤明未  
曾昏昧方信道達磨不來唐土二祖不往西天如是  
之事蓋是諸人背覺合塵流浪日久是以智光不得  
顯現所以遊方問道徧參知識若於一句下見得分  
明方知無量劫來事祇在今日然今日之事也大難  
委悉何故蓋爲諸人現分別者心本元真實誤認分  
別致背真源但無許多分別之心自然時常顯露祇  
如此事還假方便也無山僧有箇方便普施大衆乃

豎起拂子云還見麼若道見拂子翳却兩眼了也若道不見拂子生盲却兩眼了也眼則且置且道者拂子是有是無拂子若是有便心外有法拂子若是無壞却世諦學道之士到此如何理論如斯指注太甚壓良爲賤若是真正道人也無如許多事故我釋迦如來在日建立箇方便門庭亦無如許多事每至結足安居不相往來各各求證道果於九十日中或有所得或無所得或有疑慮或無疑慮或有罪或無罪至休夏自恣之日方詣佛所各呈已見求佛印可故謂之自恣自大覺掩光已來人心閑亂致有朝參暮

請種種見知所以不能得契本源也憶昔佛在竹園精舍與大比丘結足安居至自恣日時優波離尊者觀諸大衆如海清淨無有缺犯唯有文殊師利菩薩不樂所止之處好遊聚落違犯禁戒時優波離具以白佛欲擯出文殊世尊謂曰若擯得但擯時優波離遂集衆鳴犍椎左右上下皆是文殊徧虛空界一切之處悉是文殊世尊謂優波離曰汝欲擯那箇文殊時優波離放下犍椎禮拜懺悔云我小德小智不識大士境界大衆當時可惜放過甘爲樂小法者若下得者一椎莫道文殊假使釋迦老子亦無容身之處

諸人還知得者一椎落處麼若知得盡大地一切衆生四生六道一時瓦解水消無絲毫可見或有箇衲僧出來道請和尚試下手看卽向伊道動不如靜放過一着何故落霞與孤鶩齊飛秋水共長天一色小叅云古人道若是陶淵明攢眉却回去如今敢問大衆攢眉去是具眼不具眼若是具眼何故回去若不具眼何故回去到底且從你道如今却來者裏圍繞者是具眼不具眼若是具眼何故圍繞若不具眼何故圍繞還有人裁辨得麼若裁得出無絲毫遺漏五日一叅勞諸人訪及於此實爲希有然旣勞諸人

訪及爲復世諦人情爲復是佛法受用若是世諦人情我輩沙門釋子聚會不可作世諦流通也如此則有何利益若是佛法受用作麼生見箇佛法受用底道理還有人會麼莫是諸人從門前恁麼來問訊又手立地是佛法麼若是呼之無形應之有聲一切處受用無盡是佛法麼莫是本來無事何消得恁麼不見耳不聞孔孔洞洞是佛法麼莫是阿師恁麼說諸人恁麼聽是佛法麼莫是本來無事何消得恁麼大似頭上安頭但隨時及節是佛法麼莫是佛法兩字不用道着山是山水是水僧是僧俗是俗如今且

建立箇化門接引初機是佛法麼大衆素非此理莫錯好恁麼則佛法祇憑口裏意裏驅差將來若祇如此何處有佛法盡是無義語不實語虛誑語謗般若罪大不可當乍可不會却永劫無事切莫未得謂得起大我慢輕忽先達若也實得箇安樂處便須識得些子好惡辨取些子邪正不可瞞瞞肝肝罷罷統統祇恁自欺自誑山僧直是不昧諸聖如今在這裏不惜口業與諸人如此論量喚作論實不論虛我祇要箇見解明白徹底悟得底人不要你許多作用竒特機鋒玄絕棒喝齊施如此者總不消得拈出也何

故你未入門來時脚跟下已與你三十棒了也更來者裏揚眉動目彈指拂袖便出去道我勿廉纖無話會拂袖出去則且從你者一段疑情如何得見諦去且問你拂袖出道是了也祇如你大小二事時何不拂袖喫粥喫飯時何不拂袖相見問訊時何不拂袖須要說佛法時拂袖意在於何一處通千處百處一時通莫怪逆耳莫道絮無滋味我不圖你名聞利養祇要你悟得同報佛恩除此之外亦無別事你若真箇有箇入處方知山僧不分外已得者便好長養聖胎未得者正好疾速決擇你不見藥山久不上堂院

主白曰大衆久思和尚示誨山曰但打鐘着院主打鐘衆已集山掩方丈門院主白曰和尚相許爲大衆說法何故不出山曰院主經有經師論有論師律有律師又爭怪得老僧大衆你看他古人得恁麼奇特豈似而今敎者兩片皮喃喃地一似敎書相似有甚麼利濟各請散去珎重衆散師復云大衆三十年後不得錯舉

小叅云今時人須是自尊自貴自成自立始得若能如此方有箇休歇處雖有箇休歇亦無休歇之量若不如此捏目生花見事便差但識山僧拂子便得祇

如拂子且作麼生識乃豎起云還見麼若見且不識山僧拂子若不見亦不識山僧拂子且如何是自尊自貴底道理近來兄弟以遊山爲訪道觀看名叅學稱爲行脚還當行脚事麼要見五臺清涼京師兩浙廬山湖南天台鴈蕩江南江北好山好水好寺院拈起拂子云子細看取一生行脚事畢或若劬勞跋涉真實自輕大衆切須自尊自貴將知尊貴邊合着得箇什麼無事不須久立師姑本是女人做阿嫂元是大哥妻好大哥歸堂去

師云法身有三種病二種光一一透得始解穩坐地  
又楞嚴會上如來說五十種禪病如今向諸人道直  
是無病始得龍門道祇有二種病一是騎驢覓驢二  
是騎却驢了不肯下你道騎却驢了更覓驢可殺是  
大病山僧向你道不要覓靈利人當下識得除却覓  
底病狂心遂息既識得驢了騎了不肯下此一病最  
難醫山僧向你道不要騎你便是驢盡大地是箇驢  
你作麼生騎你若騎管取病不去若不騎十方世界  
廓落地此二病一時去心下無事名爲道人復有什  
麼事所以趙州問南泉和尚如何是道泉云平常心

是道州從此頓息馳求識得祖病佛病無不透得後  
來徧到諸方無有出其右者蓋緣他識病不見一日  
去訪茱萸策杖從東過西從西過東茱萸作麼州云  
探水萸云我者裏一滴也無探箇什麼州靠却杖而  
出看他露些風規甚能奇特如今僧家例以病爲法  
莫教心病好久立

師云不與萬法爲侶者豈不是出塵勞耶心不知心  
眼不見眼旣絕對待見色時無色可見聞聲時無聲  
可聞豈不是出塵勞耶無路徑處入得無縫罅處見  
得佛法亦無東西南北不道你是弟子我是師若已

躬分明無有不是者叅師時不見有師叅自己時不見有自己看經時不見有經喫飯時不見有飯坐禪時不見有坐日用不差求絲毫相不可得恁麼見得豈不是自由自在久立

師云不問又不得纔問來又成自輕了不問又焉知亦須解問始得我向頂上錐劄你要你識痛痒如揭你灸瘡甲相似靈利人便知始得莫自欺我不瞞你不見古人問如何是祖師西來意尊宿大驚曰你問他西來意作麼何不問你自己意如何是自己意曰當觀密作用如何是密作用尊宿以目開合示之古

人多少苦口後來子孫又不恁麼也入門來便喝更無如何若何生怕你明不得有恁麼一件事何不識取諸方愛教人看公案我者裏現成公案好看莫教看破大小大事諸人十二時中祇是妄想塵勞心念智慧未能發生所有流布皆從意思中來要作何用智慧如日出無不開朗喚作無分別智現前須得恁麼一回了從此去有著脚手處有與你語言分若是妄想塵勞山僧於你無著脚手處好笑好笑說東入西說西入東不柰你何若能轉頭來智慧開時便解道和尚元來與我說了我也與和尚說了搖頭時便

擺尾受整理也你諸人謾道十年五歲參禪何曾做  
者般功夫來祇是趣口快你方來我者裏肯就已覲  
在也則功夫未成沒滋味在你在者裏十年五歲做  
得功夫熟也管取悟得去我也尋常教人做功夫說  
底話皆與他古人合不差一字你但會得了便知古  
人事也你莫道古人恁麼道我恁麼會得不是了也  
祇如古人說不是風動不是幡動仁者心動有多少  
言語到你分上是耶不是耶又道我是你你是我無  
過此也又人問雲門學人自己雲門道山河大地多  
少好是有是無山河大地若有去怎生見得自己若

無現今山河大地如何說無來古人說與你了不悟  
不知龍門尋常向你道本有之事你分上現行現用  
不着尋討不着整理不着修證祇要你一信信得甚  
是省力難得如此人先師在白雲會裏端師翁常曰  
此道者天真自得之妙蓋緣有生知底事山僧見先  
師十年道不得祇爲疑得深後來徹底理會得如今  
總不費力不是思量時有不思量時又不是也佛法  
不如此袈裟下事莫教埋沒山僧若不退思參究時  
一生也則埋沒了豈有者箇消息也而今道眼不明  
出世者多罪過罪過如何敢爲人高座上也豎起拂

子示人噦嚇殺人如盲如聾相似不驚不怖祇趕目前不憂後世打鬼骨脣苦苦你諸人有福德因緣未悟心切不可作出世人禍事禍事若有真實事自然馨香你看多少虛頭禪師久久一日不如一日如刻人糞作栴檀形到了祇是尿臭氣你諸人求出生死求要出離打敎成一片又不是你和融然後成一片若敎成一片決定不成一片也昔日有一僧曾參舉道者一日遊山問曰和尚香林道老僧三十年求成一片不可得此意如何舉道者曰老僧也恁麼却問其僧會麼曰不會舉道者又與者僧一偈曰香林成

一片老僧也恁麼不待此月終重爲子決破至月末舉道者遂遷化去你道一片事作麼生好不好香林成一片龍門也恁麼爲報諸禪和當面莫蹉過各自下去久立

師云看見了不柰何者多旣看見如何却不柰何祇爲不識所以不柰何若看見識得便柰何得也然發心參禪便要會得誰不願樂祇爲無箇入處又強會不得一切處不契合一切處緣差用力取不得良久云你十二時中行住坐臥折旋俯仰種種事業一切處有超佛越祖底事祇是你纔要解會時已無也真

箇是無也你擬湊泊已背了也所以道看見祇是不奈何莫是不擬心不起解會時得麼展轉更是不得也會尚不得豈況不會若是靈利底人纔聞山僧說向你便能大開眼見得豈不是沒量大人向道是法非思量分別之所能解又道智不到處若不如此爭稱佛法而今兄弟家祇是呈箇解會呈箇見處作道理何曾解恁麼來何曾得到恁麼田地來若是有道種性底人肯恁麼去覩須是深深地體究密密地看詳忽然柰何得便無疑情也你等不明祇爲十二時中被雜念奪將去也蓋爲你要學事業見物便愛見

文字便愛尋逐時便緣將去也道業何由得辦凡學事業人各有時三十已上便不可學也學亦難成學得又何用若已事辦去學亦得在益已點化了也若已事辦又豈肯學也若二十上下猶可學若是靈利念生死之人亦不肯學也又凡是參禪須是心地平直心口相應心言直故如是始終地位無委曲相莫道我會也我柰何得也若柰何得那裏更去問人也你纔說會禪也人覩你脚手看你說話所爲底事因甚却道者箇如何那箇如何既是會禪又却是爭無明也祇如道默耀韜光是如何藏名晦跡又如何不

異人心是道又如何各自省緣莫說是非且如行住坐臥進退俯仰一切處皆是超佛越祖山前水牯牛有佛法你纔尋究則已無也何不恁麼識取久立師云龍門活計是千聖之骨髓未有一念不與諸人說自是諸人不肯承當所以却成山僧瞞你且什麼處不是與諸人說處禪僧家說道山僧不教人思量不教人會解不教人商量因緣不舉古舉今祇恁麼空過我若在別處一夏須明得公案三兩則須聽一件文字你若要商量舉古舉今却請別處去我者裏祇是一味禪所以喚作千聖骨髓我且問你適來因

什麼問訊聖僧且問訊時還印證你麼還肯諾你麼若道印證你他是土聖僧豈解印證你若道肯諾你豈解肯諾你既不解肯諾印證又問訊作麼莫是仁義道中麼莫是覩相生善麼若是仁義道中衲僧家豈有仁義豈有覩相生善莫是事不獲已隨衆問訊麼又成何道理到者裏須是一一明晰得不見長沙大師一日回頭見聖僧忽然知歸便云回頭忽見本來身本身非見亦非真若將本體同真體歷劫迢迢受苦辛諸人還會此箇道理麼玆重師云有時問着師僧總言不知不會祇管道飢來喫

飯因來眠似此說話有什麼救處更道不知月之大小不管歲之餘閏誰理會你者般事我且問你作麼生說箇不知底道理你見人說了便恁麼道還會會得那不知底道理麼古人道不知者無所不知無所不到喚作不知要你今時人到那不知底田地此是諸聖境界豈比如今拍盲不會喚作不知若總如此盡道我不知不管忽有人問着如何流通曹溪一路恐無人相續去也得如此須是勸懲決擇始得珍重

師云古有禪德問老宿云如何是出離之要宿云闍

黎足下煙生禪德頓於言下得旨諸人還知出離事  
麼若起解會心則隔了也後來有尊宿云不敢辜負  
和尚足下煙生又有北院通辭洞山山謂曰子何處  
去通曰入嶺去山曰飛猿嶺峻好看通遲疑山曰通  
闍黎通應諾山曰何不入嶺去通頓於言下得旨古  
人爲人處甚徑直每見人來無不示他是伊道入嶺  
去此意如何今人不明了須做箇會處以些子會是  
自隔了祇許體究不許會解一體體得了更不疑也  
然亦不易保任若入得是則無退失所以會處明得  
不如不會處見得亦有可保任分更無不照顧時不

曉了時所以古人道平常心是道還可趣向也無擬向卽垂看他不許你趣向又作麼生保任不易不易此豈不是出離事你若尋出離處所謂苦屈玄沙道盡大地是地獄劫住若向者衣線下不明是大苦屈不可等閑久立

師云三祖大師道不用求真唯須息見又道纔有是非紛然失心者箇言語便是教你如今人作功夫處也你見他道不用求真便道更不須求也此便是見不息是非紛然終不到無求心祇成見解今時學道例皆如此看一轉語向語下通箇見處便將一切言

句云無不是此事也恁麼記在心下用爲已有殊不知道起見解失心了也執而不肯捨大小大癡人要得無所求心麼但莫生種種諸見非是冥然百不會喚作無求尋常十二時中目前不了蓋是見心取捨你又豈得知無分別心所以先聖曰有爲無爲有異耶答曰無異也天地河海風雲草木鳥獸人物生死變化目前皆有名有爲之道寂然不動無狀無名謂之無爲如何得無異去永嘉大師道無明實性卽佛性幻化空身卽法身此兩者各別且如何明得卽底道理須是證得無求心也便和融得無事十

地中第五難勝地謂真智俗智極難得等入地時二  
皆平等故名難勝地學道兄弟二六時中了取教等  
好還知是你無分別心所畫出麼如畫師畫出種種  
好醜畫出五陰畫出人天正畫時不借他力能畫所  
畫俱無分別以不了故而起諸見見我見人自生好  
醜所以道畫師畫地獄醜狀百千般放筆從頭看特  
地骨毛寒若知是畫出何所怖畏也古人明得了一  
切處現成玄沙大師伐木次遇虎跳出侍者曰虎和  
尚沙叱曰是你虎又有僧禮拜次沙云因我得禮你  
此箇方便深符佛意法眼大師指面前狗子曰畫鏤

出諸人看時莫就狗子身上明應須將來向自己分  
上看取始得方解他道纔有是非紛然失心識取好  
久立

師云如今直下信道是也已名不唧溜者況更不能  
直下信得又堪作什麼也直下信道是何名不唧溜  
者從前許多時什麼處去來須知已失一概了也便  
見從前不了底却成分外之見我觀從上古人有從  
迷得悟者所有流布皆是從迷得悟法門有悟了知  
迷者所有流布皆是悟了知迷法門有無迷無悟者  
所有流布皆是無迷無悟法門其次來迷外得悟者

亦甚多故不足道況不知悟亦不了迷此正是凡夫也從上南泉歸宗諸人方喚作無迷無悟之見如今學者也趣口說無迷無悟又何曾到來不得容易出言蓋爲你有疑在我今問你一件事初入母胎時將得什麼物來你來時並無一物祇有箇心識又無形無貌及至死時棄此五蘊檐子亦無一物祇有箇心識如今行脚入衆中者箇是主宰也如今問你受父母氣分精血孰受名爲我身始於出胎漸漸長成此身皆屬我也且道屬你不屬你若道屬你初入胎時並不將一物來此箇父母精血幾時屬你又祇合長

在百年依舊拋却死屍又可曾屬你若言不屬見今一步也少不得罵時解嗔痛時能忍作麼生不屬你得議定省看道是有是無管取分疎不下益爲疑根不斷道有來初生時漸長至三歲五歲乃至二十時決定不移到四十五十而此身念念遷謝念念無常決定喚作有不得道無來種種運爲皆解作得道無且不得昔有一人因行失路宿一空屋中夜有一鬼負一死屍至續有一鬼來云是我屍前鬼云我在彼處將來後鬼強力奪之前鬼曰此中有一客子可證二鬼近前云此屍是誰將來客子思惟道二鬼皆惡

必有一損我我聞臨死不妄語者必生天上遂指前鬼曰是者鬼將來後鬼大怒拔去客子四肢前鬼愧謝曰你爲我一言之證令尔肢體不全遂將死屍一補却頭首心腹又被後鬼所取前鬼復一一以屍補之二鬼遂於地爭食其肉淨盡而去於是客子眼前見父母身體已爲二鬼所食却觀所易之身復是何物是我耶非我耶有耶無耶於是心大狂亂奔走至一精舍見一比丘具述前事比丘曰此人易可化度已知此身非有也乃爲畧說法要遂得道果汝等諸人祇說參禪舉因緣便喚作佛法此是禪髓何不

恁麼疑來叅取會得麼你身不是有不是無有是心有身則未嘗有無是心無身則未嘗無你會得麼更說箇心亦不有亦不無畢竟不是你本有今無本無今有斷常見解久立

古尊宿語錄卷之三十一

金壇居士于玉立施費刻此  
古尊宿語錄卷之三十一計字八千零三十三個  
該銀四兩一錢七分六厘  
雙足庵釋真福對上元李淵書深水端司禹刻  
萬曆丙辰冬十月徑山化城寺識

古尊宿語錄卷第三十二

舒州龍門佛眼和尚普說語錄

住南康雲居嗣法善悟編

師到禪牀前立云山僧立地待你諸人搆去還搆得  
麼良久遂坐曰看見了也不易作箇主宰不見古人  
喚僧云上座僧回首古人云擔板漢正當恁麼時如  
何作箇主宰免他喚作擔板漢此事也不易搆喚作  
業識茫茫不見鴻山問仰山盡大地人業識茫茫子  
如何辨仰山云某有箇驗處鴻山云作麼生驗時有  
一僧從面前過仰山云上座上座其僧回首仰山曰

祇者箇便是業識茫茫師云正當恁麼時如何作箇  
主宰免被他道業識茫茫去有般禪僧家強作主宰  
道待他喚時但莫應他便去應他作什麼你又不是  
木頭有底不然豎一拳下一咄喚作強作主宰且問  
你者裏喚時且從你豎拳下咄祇如前廊後架照顧  
不到忽然被人問着又如何祇對不可更下一咄豎  
一拳却須是實始得此事直是平等不論貴賤你看  
陳操尚書是箇俗官一日與僚屬在樓上見數僧打  
包過有一官人云數貞禪客操云未信在待與勘過  
僧行到樓前操喚云上座僧皆舉頭操顧謂僚屬云

不信道當恁麼時如何作得箇主宰免被他勘破古  
人道擔板漢則且置祇如後來人又道者僧喚既回  
頭因什麼却成擔板又作麼生會佛法到此信知有  
深遠處須久久淹浸不可强作主宰久立  
師云大凡修行須是離念此箇門中最是省力祇要  
離却情念明得三界無法方解修行離此外修較似  
辛苦不見古來有一持戒僧一生持戒忽因夜行踏  
着一物作聲謂是一蝦蟆腹中有子無數驚悔不已  
忽然睡着夢見數百蝦蟆來問索命其僧深懷怖懼  
及至天曉觀之乃一老茄耳其僧當下疑情頓息方

知道三界無法始解履踐修行山僧問你諸人祇如  
夜間踏着時爲復是蝦蟇爲復是老茄若是蝦蟇天  
曉看是老茄若是老茄天未曉時又有蝦蟇索命還  
斷得麼山僧試爲諸人斷看蝦蟇情已脫茄解尚猶  
存要得無茄解日午打黃昏久立

一日衆集師出來大衆前行兩匝長噓一聲云山僧  
在你諸人肚裏走兩遭了也還知麼非但今日如此  
常在你諸人肚裏走來走去還知得麼喚作無瞞人  
之心實是如此山僧盡知得你是好是惡所以道諸  
人知處良遂總知良遂知處諸人不知良遂座主是

箇解義阿師却明得者箇事不見一日去見麻谷谷  
見來不管他自將鋤入菜園裏良遂亦隨後去谷亦  
不顧便歸方丈閉却門他於是定省精神忽然明得  
便道和尚莫瞞良遂好你諸人如今還得恁麼也無  
也不易構更有百丈會下古靈和尚得法歸來接他  
受業師非但古人今人亦有不見四五十年前有茶  
陵郁和尚作山主時因廬山化士到言話間爲舉僧  
問法燈百尺竿頭如何進步燈云喫由是每日叅詳  
至於喫粥喫飯時未嘗離念一日因赴外請騎驢子  
過橋橋損陷驢子脚倒不覺口中云噏忽然大悟乃

有悟道頌云我有明珠一顆久被諸塵封裹今朝塵盡光生照破山河朵朵者箇便是樣子喚作實頭叅學今時人但恁麼學取若信言語解會要明者箇事明不得也將合頭語合者箇事合不得也須知有省悟之由若真實叅學但恁麼看據現定會些子言句便休也在諸人彼此行脚決擇生死大事不可據現定便休去也須是與他古人相似自討箇省發處始有真實叅學分久立

師云本有之性因什麼不會佛法無多子祇要省徑也不教滅除妄想遏捺身心閉目合眼便道是此事

不如斯也須看現定是何道理爲什麼却迷去恁麼最是親切祇如老僧未說向你諸人未曾聽時還有往來底分麼正當恁麼時切忌強作道理上至諸佛下至一切總皆如是所以聖與凡等邪與正等生死與涅槃等且問諸人過去毗婆尸佛迦葉佛古今三世是什麼人分上事十方有漏刹土是什麼人分上事山僧道總是你三十年後悟去始知龍門老僧說來切不得道是若恁麼此名外道見解久立

師云如今被人問着道不得過在什麼處蓋爲於無色處見色無聲處聞聲無道理處強作道理無主宰

中強作主宰者裏消遣不下喚作翳眼猶存空花亂  
墜何故祇爲心存在便道不得佛法無多子祇要平  
白地道得一句子便了且道作麼生是平白地一句  
子若有人問山僧祇向伊道兩句了也還會麼古人  
道佛祖言外邊事一一分明說了也祇是到者裏多  
是錯亂昏醉不省此若不見便是立地瞌睡漢子也  
諸人常在光明中開眼見了而不知教山僧怎生柰  
何久立

師云恁麼與你東舉西舉便道與你說禪纔轉脚時  
便作世諦流布將去你但念念在其中便有省發底

分看來多祇在眼耳見聞覺觸處蹉過了也須是不  
離分別心識取無分別心不離見聞識取無見聞底  
不是長連牀上閉目合眼喚作無見須是卽見處便  
有無見所以道居見聞之境而見聞不到居思議之  
地而思議不及久立

師云諸人上來要箇什麼事須是當人自作活計莫  
聽他人說古人道我十八上便解作活計你諸人須  
是解自作活計始得你道作箇什麼活計但莫別求  
如今人多愛動腳動手者箇不解作活計了也喚作  
拋家散宅漂流去分明不會祇管尋討學些子知解

記些子言句此喚作運糞入到者裏須是行李正當  
日久月深淹浸得熟便會去古人道一切處是你東  
去也是你西去也是你你是阿誰若云某甲者箇是  
情識須是透得過始得昔日天親問無着兄往內院  
見彌勒說什麼法着云說者箇法且道者箇是什麼  
法須是揀得出始得不要認着者箇多是被者箇一  
句子瞞住了也所以說病爲法是故名爲可憐愍者  
久立

師云莫謂如今說底是未是在若有箇是便有箇不  
是所以道一切言句皆不與此事相應直須相應去

此事不在別人還得相契也未且契契阿誰若道契  
於古人古人已往若道契他善知識善知識與你無  
交涉所以諸聖慈悲告報教契自心源且道那箇是  
自契底心源若有心可契決然契不得須是以無心  
之心則契矣久立

師云十二時中須有箇契合處始得你豈不見靈雲  
子見桃花便契合此事香嚴擊竹便乃息心古人道  
若不契合此事則山河大地瞞你也燈籠露柱欺你  
也如今四生六道浩浩地祇爲此事不明奉勸諸兄  
弟且先去却籠緣你十二時中思衣念食種種雜慮

如燈焰相似未有一時停歇但除龕緣所有微細自然淨盡日久歲深自然會去也不着參喚作息意忘緣不與諸塵作對所以西來妙旨意在自明龍門長老也無禪與人參也無法與你商量祇要諸人自契參學門中唯以忘緣息慮爲要者箇是從上宗旨祖不云乎以無念爲宗無相爲體若祇一喝一拍有什麼了期久立

師云弘道而心常淡泊順事而意識奔馳但願道富身貧情踈德厚山僧者裏日日恁麼時時恁麼且道恁麼是什麼離却分別心識意度言句外道將一句

來此事無你解會處如今但是心慮覺觀者皆有箇解會得及乎返窮已眼返思思慮之心爲什麼人到者裏不知便說道從本已來非青黃赤白無相無狀我說向你道此喚作言語不是你本心本心如何思量已眼如何得見正當返觀時亦無能見之者有人去者裏一口吞盡慧眼豁開頓達本鄉也今時人若爲到無見無聞處現定萬法亘然見人見屋種種萬象如湯涌沸未有一時停住祇如作嬰兒時也聞聲也見色祇是不解分別纔曉事來便采聽分別自那時前後分披了也到者裏要人整理不妨難爲他得

道人行時不見行坐時不見坐所以如來道眼見色與盲等耳聞聲與響等作麼生說如盲如響聞聲時無聲可聞見色時無色可見所見所聞皆如響等又如夢時見種種境界覺來還有許多般也無若有牀上祇是被與枕子若道無許多般又心中歷歷地記得說得如今白日所見所聞亦復如是所以道眼見耳聞底事經論可學唯有靈臺作麼生學久立

師云釋迦老子在什麼處自云作麼作麼復云達磨大師在什麼處自云祇在作麼生說祇在底道理也不妨難明若於斯明得始知正法常住禪僧家多分

祇道那舉處便是你若身壞命盡時若病說不得時又作麼生須是證入始得不見僧問德山從上諸聖向什麼處去山云作麼作麼莫是作麼便是諸聖麼你諸人若不將言語會便落他聲響流布縱饒不憚他聲響言句便落他無言無說處此事實無你意解卜度若有一絲毫便成趣向於已踈也饒你將玄機妙義去合他決定合不着若總不思量亦不可須是親證始得明見無疑矣久立

師云今時人參學錯學不出二種病一是五蘊窟宅無言無說無形無段湛然不動處便道任他佛祖出

來我也祇恁麼此是一病次認能言能語能聞運用  
施爲行住坐臥者此亦是一病你還知道動是苦本  
風力所持麼若有人能離此二病解去體究者此人  
須有箇省發時節若不如是亦無整頓處又有二種  
善知識爲兩般學人方便苦口有一般學人自作道  
理自吐箇消息進前退後豎拳合掌以爲禪道善知  
識見他恁麼便苦口向伊道你錯會了也你無事硬  
認着作麼此是一種善知識又有一般學者云某甲  
不會不知未審如何某甲並無箇契入處是故善知  
識見伊恁麼了便向伊道你無事用求會求入作麼

此亦是一種善知識前後兩般學者若聞善知識恁  
麼道善能回光體究必然明得若祇管道不會是自  
生退屈任是一千年也祇恁麼幸在其中更道不會  
求契合有什麼了日要會麼須是不立限量直下構  
取始得久立

師云今夜與你諸人說箇譬喻恰似諸人有箇眼能  
照見一切長短方圓等象爲什麼却不自見但識取  
長短方圓等象若要見眼則不可你心亦如是其光  
照矚通徹十方包容萬有爲什麼却不自知要會麼  
但識取照矚等事若見心則不可也古人道刀不自

割指不自觸心不自知眼不自見則真實矣久立  
師云諸人許多時在此立地還見一人真善知識麼  
不可空立去也山僧祇喚作假長老先聖所以道但  
以假名字引導於衆生佛是西天老比丘不勞仁者  
分別取相何者是釋迦老人阿那箇是達磨大師祖  
師未來此時還有佛法麼作麼生道無得若道無祇  
成自瞞在少林面壁時還有許多言教公案麼恁麼  
覩得破多少省徑你不上來時山僧亦不見你上座  
亦不見山僧你不見我我不見你如何辨明若明得  
復有何事佛未出世時也恁麼佛出世後也恁麼佛

減度後也恁麼若到恁麼田地實無一星事你諸人  
行住坐臥飢食渴飲怎生說箇無事除非見到底人  
方解如是昔大迦葉在靈山會上禮佛見彼大眾儼  
然便有箇見處道今此諸大衆如本未曾有你道此  
意如何諸人適來在下頭不見有許多人及乎上來  
分明見有許多人怎生說箇如本未曾有古有老宿  
問僧近離什麼處云城中宿云如今在什麼處云山  
上宿云我有一問問你若道得卽住若道不得卽去  
上座離城中城中少上座上座到山中山中剎上座  
城中若無上座則心法不周山中剎上座則心外有

法僧無語諸人苟能於此叅詳得所謂不落斷常二見六根怡然行住寂默一心不生萬緣俱息如或不然隨有隨無落斷落常譬如捨父逃走也到者裏實是不教你費一絲毫力便恁麼會取你若要和合者事教無縫罅時早已離披了也山僧往日思惟此事將謂三生兩生始可得悟去後來祇聞什麼人打發什麼人有見處便覺今人也解悟得時寒省緣辦得明究已躬此是大事久立

師云若有人問你作麼生道還道得麼你等思量管帶道得一句子來有什麼用處三更半夜作麼生道

天明起來作麼生道前廊後架作麼生道還道得麼須是眼明始得久立

師云適來侍者報道雨不住若叅時恐大眾不聞如今雨住也諸人還聞麼山僧道雨不住時最親切何故却爲諸人無采聽底心祇如諸方示人道雨聲爲你說法了也還會得麼直下明得更有什麼一絲毫頭子也今時行脚人須待將一句子契他善知識恁麼自苦自屈作什麼我更問你契那箇善知識若要契他善知識意但識取你心我更問你那箇是你心又作

麼生識向者裏強會不得須是一回省發乃可古人不得已向無言詮處假立言詮無方便中巧施方便玄沙一日入山逢虎侍者報云和尚虎玄沙云是你虎現今山河相對刹土縱橫分別思惟千差萬別怎生說箇是你底道理者裏若不了一切處礙塞殺人祇爲諸人歷劫循塵爲物所轉你試指出那箇是物何者是你所以有僧問玄沙學人乍入叢林乞師指箇入路沙云還聞偃溪水聲麼云聞沙云從者裏入今時人不明了祇管道心性周遍更是誰聞如此言論有何交涉直須是通身赤條條地不掛寸絲始得

且問諸人還着衣麼良久云得恁麼不識羞恥久立

師云纔作道理便難會去須是不作道理始得有般聞恁麼說了便道我都無言說亦無道理却不知正是道理了也如今與你斷約一件事以明見自心爲極則此一句便是龍門山裏佛法也古人道心不自知心不自見諸人作麼生明見去自心也難見從上諸聖皆是明見自心底人先師便是明見自心底人也祇如當時先師會中有多大方來兄弟能有幾人明見自心極是少也心不見心須是不見是心始得

此乃離念境界如今若與諸人說便道貶剥諸方若不說此事亦難明曉有般宗師向人道癡漢者一段事你因何不會先將自心做箇窠臼然後將心去取證喚作釘樁了達樁走便恁麼流傳去便恁麼承當去敲牀豎拂用將去喚作將心用心又有般宗師向人道莫作計較道理開口便沒交涉了與他不相應也去空劫已前認取都無言說一似坐箇氣毬相似有甚安樂處又似蝦蟇努氣相似你作恁麼見解面前一似黑霧罩定了也山僧至誠相勸不是妄說不是作道理籠罩人不肯人壓良人山僧都無如是道

理若或你祇麼認將去也由你若道我也如此見得也由你若道據我見處總得也由你若道某心下未穩在也由你須是不自欺始得世間有多少宗師說禪說道爲自欺不自欺爲欺人不欺人須是子細山僧舊日在先師會裏受廬州化士行至熨斗寺前值泥雨忽然滑倒心中煩惱自言我行脚禪又叅不得自早至今飯又未喫更恁麼受辛苦聞有兩人相罵道你猶自煩惱在山僧聞得忽然歡喜却尋不煩惱處不得益爲打疑情不破後來四五年方知得如今兄弟須是如此用心照顧始得今夏舉無情說法因

緣祇是錯會者多你見無情便說無情若見有情便  
喚作有情你叅禪人不明無情說法如何了得行脚  
事做善知識不會無情說法如何接物利生相勸諸  
人子細窮究令悟去如未有領覽處且緩緩叅取不  
要忙久立

師云先師常說箇譬喻如外國有二人來大朝探事  
初入界時兩人商量了各自分首一人東去一人西  
去從一州至一州從一縣至一縣行來行去忽然到  
東京城裏兩人在朝門前相撞着因者箇覲那箇那  
箇覲者箇並無言說從前許多商量本國中事歷歷

地分明挨肩便過人知得奇怪諸人且道恁麼撞  
着時如何恰似禪和家做功夫相似今日體得些箇  
明日究得些箇窮來窮去一日現前全似朝門前撞  
着一般喚作打發須得恁麼一回始得方謂之行脚  
事辦又如去鄉多年鬧市中逢見老爺相似便乃識  
得無疑亦不須問人是爺不是爺兄弟但恁麼管帶  
莫爲等閑時不待人祖師道光陰莫虛度各自宜努  
力久立

師云古人道鐘中無鼓響鼓中無鐘聲今時學者那  
裏得到者般田地有時入室見兄弟下一轉語及乎

更與一拶便祇管主張道適來已祇對了也不可別  
有也多少分明恁麼做功夫有甚巴鼻癡漢豈不見  
先聖道言言見諦句句歸宗你未會了祇管胡亂主  
張今後入室不要如此乍可道不會却受整理久立  
師云稱禪客須是信人說話始得若不信了教人干  
說萬說亦無用處呵呵不信了祇管聽人說爭名禪  
客夫禪客者風塵草動時悉皆曉會朕兆未生未落  
思量意路未動時便識取方名禪客何故者般事用  
敵生死也須是箇不爭多底漢始得不見雲巖叅百  
丈二十年不明此事道吾爲他直得咬斷指頭你看

他古人雖不明亦不憂道我不會心亦不休亦不馳  
求言句又如雪峯和尚三到投子九上洞山在投子  
時一日揭簾入庵投子見來便下禪床立峯擬議子  
便托出峯直得哭後來到洞山又理會不得乃到德  
山問從上諸聖學人還有分也無山打一棒云道什  
麼峯當下如桶底脫相似及至鷲山尚云有疑在看  
他古人直以疑圓子破也方始休便道事已了意亦  
休此箇元來觸處周今時兄弟叅請多是依言起解  
亂作主宰不然將古人悟處喚作因緣去那裏看喚  
作過話有什麼交涉祇如雪峯三上投子九上洞山

豈爲言語兄弟直須退步體究如何退步且不是教  
你長連床上閉眼坐硬捺身心如土木相似百千萬  
劫也無用處若要退步時你有不會底語言不了底  
因緣便頓在面前退步自看因什麼不會去良久曰  
僧家道思量也不得不思量也不得却教人如何看  
我向你道但退步看良久又長噓云好悶殺人好難  
會祇你那悶殺人是什麼悶殺人是誰你恁麼退步  
來看漸漸惺也一日光明一日漸見廣大又不得一  
向去者裏認了便道是了當也便是柱定殺了也濟  
甚事須是着些智慧來觀看古人許你管帶一路若

如是休歇退步管取有箇道理此是爲都不會無所  
知者又有般胡說亂說如何若何底漢你但亦退步  
看你那胡說亂說底是什麼但恁麼回光返照看方  
是若一向如此做功夫畢竟亦有悟期若不相信也  
無可柰何山僧初參勝和尚敎看如何是佛法大意  
楚王城畔汝水東流又令看風幡話及至下來參老  
和尚乃請問古人聲色純真老和尚千說萬說祇是  
理會不得後來又令看如何是奇特事云你道什麼  
遂却喜歡益爲有箇撮摸處遂常看云如何是奇特  
事云你道什麼獨自思量云我道什麼來我道奇特

事又不見有奇特處看三年不會遂去游浙中途回來却令看殺父殺母佛前懺悔殺佛殺祖向什麼處懺悔雲門道露者公案一似熟鐵一團在心中七年喫盡辛苦衆中久叅方知更與你說晦堂初叅禪時自桂府來先見雲峯悅和尚三年不會他說話又叅南禪師二年不會却過去山主院裏過夏因看傳燈錄僧問多福如何是多福一叢竹福云一莖兩莖斜晦堂遂開悟今時人祇喚作問答語蓋用功不子細不曉古人方便山僧相勸兄弟既在林下各自學道勿空過時以悟爲則久立

師云親近善友先聖叮嚀付囑也今時學者須是依佛祖之言尋師決擇始得若不恁麼何名學者若要明此事須是起疑叅究你若深疑此事便是般若智現前何故行脚事祇要疑情息你若不起疑爭得疑惑息不見先師三十五方落髮便在成都聽習唯識百法因聞說菩薩入見道時智與理冥境與神會不分能證所證外道就難既不分能所證却以何爲證時無能對者不鳴鐘鼓返披袈裟後來唐三藏至彼救此義云智與理冥境與神會時如人飲水冷暖自知遂自思惟冷暖則可矣作麼生是自知底事無不

深疑因問講師不知自知之理如何講師不能對乃云座主要明此理我却說不到南方有傳佛心宗尊宿却知此事汝須行脚始得先師便行脚游京師兩浙凡是尊宿便問此事無不對者也有說底也有下語底祇是疑情不破後來浮渡山見圓鑑看他陞堂入室所說者盡皆說着心下事遂住一年令看如來有密語迦葉不覆藏之語一日云子何不早來吾年老矣可往參白雲端和尚先師到白雲一日上法堂便大悟如來有密語迦葉不覆藏果然果然智與理冥境與神會如人飲水冷暖自知誠哉是言也乃有

投機頌云山前一片闊田地义手叮嚀問祖翁幾度賣來還自買爲憐松竹引清風端和尚覩了點頭諸人此豈不是深疑了親近善知識然後明得祇如先師行腳參善知識後來却道問祖翁是如何自賣了却自買是如何須知無有剩也古人道總是你又道我未嘗有一句子到你若有一句子到你堪作什麼諸人要疑情破麼亦須是似先師一回始得久立  
師云你但看馬大師見僧下塔乃召云大德僧回首大師云從生至老祇是者漢回頭轉腦作什麼其僧言下領旨此理如何從生至老祇是者漢你道是那

箇漢你纔起心要見者漢時便不見者漢者漢難見  
千難萬難今時人祇道是者箇漢更是阿誰不可別  
有也一百箇中有九十九箇如是會有甚巴鼻若恁  
麼如何明得從生至老底事如何便見得祇是者漢  
你若不見者漢四大五蘊總未知下落處且如祇今  
說法聽法是有說聽是無說聽若道你立我坐我說  
你聽三家村裏人也解恁麼道焉敢稱禪客若謂無  
聽無說又道從生至老祇是者漢所以到此須是求  
一箇了達底人決擇山僧向前未明得時總不柰何  
了便請益先師纔問著時先師祇道我不會我不知

我不如你又問禪畢竟是易叅難叅祇向我道你無  
事問難問易作麼叅禪喚作金屎法未會一似金會  
了一似屎山僧甚不肯此語如今思量了語雖籠其  
間旨趣不淺此盡是了達之士發一言半句皆不虛  
也凡爲人時皆不胡亂指示亦不亂許人今時有諸  
方知識有時說得是有時說得無巴鼻此理如何益  
爲他亦未了達有時許人道是有時却道不是若如  
此爭明得從生至老祇是者漢子細看來今時人也  
祇是舊時人今時作用也祇是舊時作用千變萬化  
也祇是要你者裏自肯一肯方始得了當今時人不

了當者祇是不解決擇如何是不解決擇處祇是將古人言句作解會將自己來錐鑽祇是如此到彌勒下生也不會何故向你道回頭轉腦便不是了也向者裏省力處更不用如何若何直下明取你諸人先將道理近前用古人言句自纏自縛一似淨淨潔潔一片地却將一手土撒在上面相似山僧前日入室垂示道你如今到者裏不可也似適來相似須有箇會處始得有者道適來也祇恁麼如今也祇恁麼你先走入情識裏了爭怪得你古人多少慈悲向你道行是佛行坐是佛坐一切法皆是佛法一切聲皆是

佛聲你錯會了便道一切聲真箇是佛聲一切色真箇是佛色既不許如此會却如何即是向你道纔涉朕兆時早支離了也欲將智照顯他時早昏暗了也如今但莫取我口各自由你做功夫看古人因緣亦得靜坐亦得一切處觀察亦得皆是你做功夫處一切處是你證入處但一處精專日來月往須被你打發去不見古靈和尚行脚歸其師問云汝離吾行脚得何事業曰某見百丈得箇安樂處遂舉百丈頌云靈光獨耀迥脫根塵體露真常不拘文字心性無染本自圓成但離妄緣卽如如佛其師於言下省悟又

雪峯和尚見風吹芋葉動遂指似僧僧云某甲甚生怕怖峯咄云是你屋裏事怕作什麼其僧亦有省既一時是你屋裏事爲什麼却不會蓋爲你隨處流浪不常在家但如今對善知識時莫教忘却喚作順理而行就已知歸復云從生至老祇是者漢回頭轉腦作什麼各自看取久立

師云如今明得了向前明不得底在什麼處如今明不得到幾時明得去祇恁麼翻覆體究也須會去所以道向前迷底便是卽今悟底卽今悟底便是向前迷底若言從前迷卽今悟也又言明來暗謝智起惑

忘恁麼還得麼那裏得如此則有暗可滅有惑可除不見古人道不改舊時人祇改舊時行履處你禪和家道有什麼難迷也祇是者漢悟也祇是者漢不可別有及乎問着他那箇是者漢便去不得不然胡說蓋緣未曾諦當證入此是諸人入骨髓底病謬底漢便認著一生休非但一生千生萬生亦祇休去若是靈利底他須解體究那箇是者漢直求入路處師乃噓一聲今時佛法淡泊衆中也難得人諸人旣在龍門學道不可空過十二時管帶構取覲見諸人也似不爭多你不見臨濟和尚道赤肉團上有一無位真

人常從汝等諸人面門出入未證據者看時有僧出  
問如何是無位真人濟下禪牀把住曰道道僧擬議  
濟便拓開又道汝眼放光照破山河也古人多少慈  
悲如今人不以爲事須是尋人決擇你不見嵒頭雪  
峯欽山去見臨濟路上逢定上座頭問什麼處來定  
云臨濟來頭云和尚萬福定云和尚已遷化也頭云  
某等特去禮拜又值和尚遷化不知和尚有何言句  
請上座舉一兩則定遂舉臨濟上堂示衆云赤肉團  
上有一無位真人常從汝等諸人面門出入未證據  
者看看時有僧問如何是無位真人濟下禪牀擒住

云道道僧擬議濟便托開云無位真人是什麼乾屎  
橛便歸方丈嵒頭不覺吐舌欽山云何不道赤肉團  
上非無位真人定便擒住云且道無位真人與非無  
位真人相去多少速道速道欽山直得面青面黑嵒  
頭雪峯同勸云者新戒觸忤上座且望慈悲定云若  
不是者兩箇老漢程殺者屎牀子你看他道非無位  
真人定何故不肯今時學者那裏到者般田地祇管  
認箇五蘊身田強作主宰不能放下我今舉幾則語  
教諸人看雪峯參投子問者裏還有人參麼子擲下  
鋤頭峯云恁麼則當處掘也子云不快漆桶他道當

處掘尚做漆桶又有南際長老見雪峯語論無不相  
契峯令見玄沙沙問古人道此事唯我能知長老作  
麼生會際云須知有不求知者沙云山頭老漢喫許  
多辛苦作麼你道此理如何又先師在海會端和尚  
會中時端和尚舉古人道如鏡鑄像像成後鏡光向  
什麼處去會中有頭角兄弟下語皆不契端和尚云  
須是道者子始得先師時作街坊却從外歸端和尚  
舉前話問之先師近前問訊云也不爭多端和尚撫  
掌大笑人皆謂摩訶他教做化主什麼說話山僧此  
中祇要學道如要學道十二時中須是先去却無明

人我何故人我乃庸人之事先師一生無人我山僧  
在他身畔作侍者見多少不會有一念煩惱曾說舊  
時有箇上座在海會做知客先師因送一箇長老住  
四面乃率知客相送不知如何者上座便劈面唾先  
師你是甚人却教我送他惡言不止先師遂休總無  
人知得後來仍來太平先師請伊作知藏又做首座  
復自求作監院亦從之及先師住海會乃舉住太平  
知州不肯又惡罵謂不主張他先師方出言道者漢  
兩度罵我也以此見伊無人我今人纔有些言語便  
要理會如此作麼生學道有時見初機兄弟入室祇

是爭山僧覲他了也不奈何一似村裏人把扁擔共上將軍鬪我者裏七事隨身手中是關羽八十斤刀他便把扁擔劈頭打一棒見人不動又連打數下去我不是怕他蓋不是對手呵呵勸諸人不要罷心日夜行持做箇向上人縱然不悟亦是高士切須用心久立

師云你纔認着道是便被縛脚縛手更轉動不得也則被你一認認了縱有千般亦不是也你若不認着却有箇救處譬如造得一隻船上面一一裝載了要千里外至乎寶所纔動手你先自釘下椿繫却船了

却用力搖櫓你搖到彌勒下生也祇在岸邊你見船東簸西簸將謂是轉動又何曾離得一步來又似磨茶漢子從早至夜團樂旋轉極是好笑若眼目不明底見你認着向你道是也被明眼人覲見點檢出來多少露栓索如今多分祇用箇如今底道總離如今不得祇被恁麼地釘下椿叅學不得旨趣一時把持錫見章敬谷振錫一下卓然而立敬曰是是又見南泉亦如前泉曰是不是谷曰章敬道是和尚何得道不是泉曰章敬則是是汝不是此是風力所轉

終歸敗壞谷方省過你諸人看幾錯會一生爭得不就人決擇山僧初行脚時見先師偈句便信道此人似古聖說底事必有實證處便十年間叅扣先師頌道學道先須得旨歸聞聲見色不思議若憑言語論高下一似從前未悟時又云空門有路人皆到到者方知旨趣長心地不生閑草木自然身放白毫光我後生時雖造道未得心中知此非常句也祇如聞聲見色皆可思議又何緣得不思議及乎論箇證處却云一似未悟時未悟時皆可思議如何見箇證處此人得無所得至究竟地方解如此我後來十年外始

領他事大凡行脚學道叅尋莫癡坐就人決擇此法難了喚作隔宿不問道若得了便別也昨日也喫粥喫飯今日也喫粥喫飯豈昔人耶別也不同也趙州向人道喫粥了也未曰喫粥了也州曰洗鉢盂去便是別也吾豈常人也你道何處是別處久立

古尊宿語錄卷第三十二

金壇居士于玉立施賈刻此  
古尊宿語錄卷三十二計字九千七百八十個該

銀五兩零八分五厘  
雙足庵釋真慧對上元李淵書深水端司堯刻  
萬曆丙辰歲冬十月徑山化城寺識

古尊宿語錄卷第三十三

舒州龍門佛眼和尚普說語錄

住南康雲居嗣法善悟編

師云山僧教人識取自己師僧家聞得了却云初機  
學人看底事有甚難會你且緩緩且子細你用何者  
名自己祇如古德對自己語云遊山覩水你道我會  
也更是阿誰又對自己云是你自己你道我也會得  
是我自己且如對伊道山河大地又道喰飯時飯是  
你自己又怎生會又却去不得古德云盡大地是你  
自己又且如何消遣每常見人錯會了舉轉古人事

問伊祇如鏡清問玄沙曰學人乍入叢林乞師指箇入路沙云還聞偃溪水聲麼清云聞沙云從者裏入清從是得旨我問你聞時聞箇什麼箇箇對曰聞水聲如此見解堪作何用據他所見聞處歷歷地一時領得離此聞外無聲可得盡從我者裏顯現者箇是業識有底對云不是水聲是聞自己山僧向道自己了如何聞自己所謂認心認性佛法是箇省力易會法門人自辛苦古人見不奈何了向人道你試一念靜思看好言語後人不明古人意了去那裏閉眉合眼捺伏身心堆堆地坐了等悟好癡好癡久立

師云不見祖師道風鳴耶鈴鳴耶便好休歇也更煩他道非風鈴鳴乃心鳴耳你更討什麼參請也及至此土道非風幡動仁者心動祖師恁麼印證因何不會祇爲箇能所以道因能立所既妄立生汝妄能無同異中熾然成異今時人言決擇且如何決擇莫是道者箇是入門底語者箇是初機語那箇是久參語麼總不如是元來一時放下正是決擇於一切時無異緣自早辰起披衣洗面歸寮等事你喚作雜想也祇要你見色時無能見所見那裏不是聞聲時無能聞所聞心裏思量時無能思所思佛法最易最

省力自是你費力自作艱難若易處不見且究理而坐既來龍門參禪莫將來比諸處妄想十度但退步看須會去然有般兄弟受整理有不受整理者愚者有智者有可救有不可救且如不受整理者硬將生死業識來用將粥飯氣來用問着則瞪眼進前退後舉坐具在髑髏裏皮袋裏昏昏地認箇識情此不可救你但放下了退步來看方會又有般上座道我都不作道理都無計較不着聲色不依染淨聖凡迷悟一道清虛大光明中都無是事此又被智光蓋却着在智邊亦不可救有此兩般病前病猶淺後病更深

你但肯拈放一邊退步看亦自然會去此事甚是省力古人道甚是首要又道費力作麼有時見師僧來此間費力喫許多辛苦作什麼須要些言語向皮袋裏有甚交涉然有一真實方便極好若非久參者不會疑着如玄沙一日欲說法大眾立久都不說一言遂兩兩三三散去沙云你看今日真實爲他也無一人構得待我開兩片皮一時近前來也你來龍門討方便討法門討安樂龍門也無方便與人也無一法與人也無安樂法與人何故若有方便却成埋沒上座籠罩上座趙州道你但究理而坐三二十年若

不會截取老僧頭去亦則要成一片去豈不見二祖  
大師隨處說法聞者皆得正念不立文字不論修證  
因果時有禪師聞之遣高弟潛聽說法不回禪師大  
怒因大會次親語云我費許多力挑撥你你因何得  
恁麼幸負耶彼云我眼本正因師故邪者箇是叅學  
樣子也後人問雪峯云我眼本正因師故邪時如何  
峯云迷逢達磨僧云我眼何在峯云不從師得須是  
恁麼始得古云道常合人人自逐物經中道若能轉  
物卽同如來物且如何轉又道凡所有相皆是虛妄  
若見諸相非相卽見如來古人道若見諸相非相卽

不見如來但退步絕照子細看忽然覩着怎生奈  
你何久立

師云無迷無悟到得恁麼田地方安樂最省力祇是  
箇無迷無悟底人十二時中有何法迷却上座應須  
裏私自家裁斷看三界二十五有迷心故有如今如  
何得無去旣無未得迷情決然柰何須證取無迷  
無悟事方得灑落行脚人喚作袈裟下事事若未了  
禍事也此是大苦馬鳴祖師說箇三細六龕動卽有  
苦如何得不動去不是說一句兩句便當得譚玄譚  
妙說義說理坐禪入定當得自家無事獨自思量看

平生所作所爲他人不知你自返照是合道理不合  
道理到者裏自瞞不得也好時好日不趣取究令徹  
去先師出世時道此大寶華王座每日與諸人同起  
同坐自是諸人當面諱却也好言語又道十餘年海  
上雲游覓箇冤讐不會遭遇及到龍舒果見其人方  
契憤憤之心好言語恁麼說話少有人說得山僧行  
脚三十有餘年也老僧得道時諸人未生在後生家  
信取恁麼說底事逐日退省看教徹去久立

師云禪門名迦葉大寂定門不動一絲子無所不通  
不動一毛頭無所不達非是祇恁麼不動便休去諸  
上座大庾嶺上不思善惡了方見得便道某甲雖在

人十二時中但不起心動念了一時會得通達一切  
名迦葉門下人方入得大寂定且何法爲緣爲礙雖  
許人參究許人學祇是不許人起心動念會若逢緣  
遇境或一言半句纔念動心起作解俱在散位也明  
黃梅實不得佛言不此岸不彼岸不中流南泉云  
不是佛不是物正是你今人管帶處但恁麼學如秀  
才及第一回從此是官人心要一回了是佛方無疑  
各自將爲事莫趣閑過久立

頭且如何回頭不尋尋不尋者箇便是人難措入處也不尋如何尋尋如何不尋若但尋何異尋聲逐色若一向不尋又何異土木瓦石須是尋而不尋不尋而尋若入得也始和會得尋與不尋所以道不尋不尋法身圓寂尋尋應用不差尋不尋不尋尋境智冥會體用一如故得三身四智五眼六通從是開明學道人解恁麼回頭尋究始得豈不見僧問仰山和尚別有何徑截願乞指示山云別有別無轉令汝昏昧汝是甚處人云幽州人山云汝還思彼中不云常思山云所思者樓臺殿閣市井人煙有許多般你返

思思底還有許多般麼云無許多般山云據汝見處祇得一玄得坐披衣向後自看大眾者僧道所思有許多般思底無許多般見解有偏致令仰山道祇得一玄道眼不正若據山僧所思樓臺殿閣有許多般便是無許多般思底無許多般便是有許多般可驗現今日前有許多般便是無許多般無許多般便是有許多般亦如毗目仙人執善財手善財見無量世界微塵數諸佛仙人放手宛然依舊好大眾放下手了宛然依舊且作麼生會會取好久立  
師云先聖道法法本來法好雲門拈拄杖云不是本

來法良久曰若如是則三毒四倒五蘊六入十二處十八界二十五有不是本來法何不恁麼會取多少省力佛法是箇最省力底事何嘗不現前自是你不會又向你道無法無非法何於一法中有法有不法祇爲馳求不息了一切處皆是馳求思惟道理也是馳求看古人公案也是馳求看禪冊子也是馳求假饒靜坐念念不住亦是馳求要會麼則你那馳求便是不馳求箇中極難信入難做功夫不安樂者蓋爲你等不沉則掉所以道不會去如今如何得不沉不掉則你那一念起是生滅流轉爲是業識耶爲是不

動耶恁麼翻覆看來便有些子道理久立

師云同床共被夢各不同先聖云同共一法中而不得此事且如生死一法中入得生死而不被生死縛者在生死被生死縛者同共一法中一人縛一人脫豈不是夢各不同你尋常生死作一邊無生死作一邊思量作一邊不思量作一邊有言說作一邊無言說作一邊山僧此中也無衲僧事及向上事祇論出生死事不祇恁麼說一句了休須是卽生死中見無生死事豈不見永嘉大師見六祖云生死事大無常迅速六祖云何不體取無生了無速乎嘉云體卽無

生了本無速又如曹山辭洞山洞山云什麼處去曹山云不變異處去洞山云不變異處豈有去耶曹山云去亦不變異豈不是了得底人你思量爲一邊不思量爲一邊於言說外做箇無言說縱饒你會得箇無言說處分明纔有言說便得著你也終日行住坐臥不會行住坐臥何不恁麼叅究有時師僧來此下一句拍一拍那裏當得見解不出二邊你須是去思量看我分明在生死中如何得無生死去莫道便是也我本來無生死不由你說者一下子便了有底聞人說無生死便道是也本來無生死若恁麼作解便

難會也既不許人作道理起會解又不許人說却如何作功夫你不見古人道我祇把你將來底示你箇入處環重

師云看見今時叢林中兄弟似總不說此事相似祇如天下到處叢林知識說禪說道入室陞堂無不是說此事何故道不曾說著說則說也則是說不着不惟說不着亦不解覩不解恁麼作功夫祇管道正令全提十方坐斷佛來也打魔來也打一向說禪元來緊要處不曾說着山僧者裏所說者是諸方掉下不要者等閑地糞掃堆頭拈將來問人又却道不得祇

如今早入室問道明得底人見香臺時是香臺不是  
香臺若道是香臺與尋常人一般若不是香臺香臺  
却分付與誰輕輕將來問着便七花八裂蓋緣尋常  
總去閑處做功夫我且問你不說入衆來未行脚未  
入衆時見香臺時喚作什麼曰喚作香臺又曰大家  
喚作香臺何不思量因什麼喚作香臺禪須是恁麼  
叅要明你無始時來事修山主道不見本來法障礙  
是從來若人有障礙顛倒幾十回先師道如人睡着  
將一點糞着在鼻端上初不覺知及至起來或聞臭  
氣嗅褊衫謂是褊衫臭遂脫却褊衫拈得物來一切

皆臭不知道臭在他鼻上忽有智人向伊道不干別  
物事剛自不信智人云你但將手向鼻上揩看則是  
不肯若肯揩一揩方知早較些子遂以水洗去之全  
無臭氣若嗅一切物元來皆無臭氣叅禪亦然不肯  
自休歇向已看者下尋會解那下尋會解覓道理做  
計較皆總不是若肯回光就已看之無所不了不見  
道一根既返源六用皆不行但如此觀却有悟明分  
久立

師纔坐呵呵笑曰猶自不會良久又曰我恁麼說向  
你猶自不會若到別處更作麼生會也諸方不是走

作你便坐定你我者裏也不走作你亦不坐定你直是省力易會因何却不會祇爲你千方百萬便巧作道理所以難會去佛法是箇易會安樂底法雖然易會祇是難入難做功夫若是諸方坐定你便有箇做功夫處走作你便有箇咬嚼處兄弟家來說道不敢道是則你那不敢道是却如何何不恁麼去看祇恐你向者裏亂會亂有領覽祇要教你不動一念便明得去又有道據我見處千是萬是也此正是如焦穀芽如敗種子永不發生你已道是了也更如何救須是深疑著此事所以道凡夫有返覆又有者會了却說

不得縱說得亦不成道理不要草草子細體究山僧與你同叅我若會時你也須會始得你若不會山僧亦不會也不見玄沙指面前一點白問僧見麼僧云見沙云我也見你也見因甚却不會有箇同叅禮上座見先師得一年半凡入室祇向伊道上座也分些經素麼度度去度度如此似恁麼說話如何解會如上座叅請也若是別人則煩悶去了也一日聞先師上堂云同門出入宿世冤家懵然地心下如落秤鉗相似從前見解如去空中花相似從此見諦須是如

此做功夫如此證悟禪須是恁麼叅今夏已一月也  
殊不見兄弟有覺觸處直須鼎省精神若是無人說  
着無人開示便難做功夫也旣是遇人便好做功夫  
須是分縕素始得久立

師云而今行脚兄弟可信道有頓悟底事也諸方亦  
可說有頓悟底事若無頓悟底事如何却名叢林益  
爲從來相傳祇是看古人公案或看一則或兩則畧  
有一知一解若有理會不得處亦尋縫罅鑽研求會  
旣會得了道此事祇如此也便在叢林中流布將去  
皆不說著頓悟底事若無頓悟底事則三界二十五

有如何消遣疑情如何消落去今早有箇師僧來說  
道見聞不昧一向去認見聞便道是也則是不見那  
不昧處問他方世界事又不知問根塵下事又不破  
如何却以凡夫情量便同頓悟底事山僧今日普告  
大衆但信取有頓悟底事譬如村夫於耕田處拾得  
一粒金丹服後渾家上昇又似白衣拜相相似教中  
說你那凡夫情量如似土坯未曾經大火中煅過都  
用不得須是經大火中煅過始得却似得一回頓悟  
相似山僧自川中來祇叅一人知道此人說話與古  
人一般嘗問先師道聞禪門中有悟道果否先師云

是若無悟那裏得你但緩緩地叅山僧便寬心叅究  
有復首座見地明白所以山僧常去詢問祇向山僧  
道須是自家做活計莫來問我一日舉趙州夾火示  
僧云不得喚作火是什麼山僧深疑著分明是火如  
何却不喚作火如是看三年常自思惟爭敢以凡夫  
情量便問他聖人所證處又曾聽法華云是法非思  
量分別之所能解常得此一念如今兄弟家道便是  
者箇也爲你一起解會了便不會也又先師曾到李  
提刑宅提刑請就書閣中燒香了將傳燈錄白先師  
某雖俗人素留心此道每看此錄多有不會處一一  
着也久立

望和尚開示先師云此事不如是理會須有省悟始  
得若有悟處無不會者自不消問人若無省悟祇那  
會處亦未是在提刮云吾師說得是又山僧平生事  
因作知客在火爐上會得自後無有不會底事衆中  
兄弟須是見頓悟底事始得今時叢林中例皆不說  
着也久立

師云山僧分上無有不是者若有一絲毫不是處爭  
敢說向人爭敢指示人山僧分上是時無能是底心  
又無所是底法所以方敢說向人若約諸人分上明  
知有不是處所以來就人決擇若已是了更幾時去

問人也然而山僧者裏祇指你是處你若不是終不敢道你是等你是也山僧肯你也祇賭是大衆山僧無有不識者或曾見人來或有悟處或無悟處有無會解皆知得伊如世良醫一見便識病或冷或熱可醫不可若一一問候方知此乃庸醫如前日舉法眼指簾子有二僧去捲法眼云一得一失你等事須不得道有什麼得失又道一人會來去捲是得一人不會來去捲是失若恁麼怎生會醫如今明未得益爲悟心未諦如不識病稱醫者他人會也不識不會也不識有無見處總辨別不得却如何爲人如何說向

人須是剋骨究竟始得若肯去剋骨究竟無有不會者不見古人道你但究理而坐三二十年若不會截取老僧頭去作尿鉢子僧家有時道是也却到剋骨究竟却走作不定如隔牕看馬騎相似忽尔便過直須似三二萬斤鐵相似牽不前推不後方知是實你等纔被人撼着早動也更着力推一下便倒了也須是洞明頓見三百六十骨節八萬四千毛竅一時開空過了諸人無過此時好也既在其中定省精神努張內身外器法法皆是本來法無有不是始得而今師僧依倚方能道得若一時去却則無湊泊處又謂

力究取珍重

師云若論平等無過佛法唯佛法最平等若道我會  
你不會不是佛法也你會我不會亦不是佛法也教  
中道是法平等無有高下名阿耨菩提山僧見處與  
諸人齊等諸人見處亦與山僧齊等又古人道諸人  
知處良遂總知良遂知處諸人不知因何却不知去  
良由仁者心有高下不依佛慧遂見此土土石諸山  
穢惡充滿須依佛慧始得也聖人說底便是平等法  
也道卵胎濕化四生九類我皆令入無餘涅槃而滅  
度之如是滅度無量衆生實無衆生得滅度者豈不

是平等法古人道涅槃名廣度無餘一味收卵胎并  
濕化空有及沉浮薩埵能降住菩提道自周倏然纖  
芥在此岸永淹留纔有纖毫不盡便是此岸也又道  
刹那流入意地便爲生死根栽豈可亂有所證妄生  
解會耶古有尊宿向人道各各有初心在最初發心  
行脚必爲生死故發心或厭苦故發心或爲事緣逼  
迫不獲已發心皆名發心何故令人看初發底心謂  
你最初發底一念不易轉頭來最有力此是你參底  
禪也若得現前時祇是此心明淨也中間求訪宗師  
日夜推究祇是養育此心乃至悟得了便見未發心

時亦則不失馬鳴祖師謂之始覺卽本覺本覺卽不覺本始不二名究竟覺又道初發心時卽成正覺謂先證得果頭佛六度萬行成熟之事也所以令你但推究初發底心且山僧見處與諸人一般何不恁麼會去久立

師云明眼漢沒窠臼你尋常構不及者祇是眼不明眼若明却構得也所以說道明眼人難得你纔道是恁麼便是窠臼也若是明眼人卽不恁麼不見德山示衆道今夜不荅話問話者三十棒若不是明眼漢怎生構得纔構不得便落意思卽成聯兆故德山平

生則嵒頭一人構得所以道須是明眼漢始得久立  
師良久告衆曰祖師真實好知音呵呵笑了又云也祇得恁麼說也若明得者親得受用便有履踐處若涉道理涉討較涉言說則不會也亦不親得受用也你在廊下東行西行時寮舍裏洗衣擇服時還見得祖師真實好知音麼良由不見問著便脚忙手亂病在什麼處病在你尋常祇是思量計較中來不親得受用皆是去長連牀上閉目藏睛擘劃思量得盡上窮銀漢下徹黃泉方說得一兩句却到閑處時又不知下落也目前盡是礙人之物輕輕問著便去不得

如今據實理論不要亂說我且問你不與粥飯喫三日時還動得麼定是動不得也纔方喫得些粥飯方能動得若恁麼盡是粥飯氣到者裏便要得人也須是見得非粥飯氣底事始得禪須是恁麼叅如此方名決擇既喫粥飯了須扶持你者事把來叅取恁麼一件事你却總不知却去閑處用了也說是非管閑事或思量或擘劃可惜許盡把來胡亂用了你不知纔擬心早是後世也剎那流入意地便爲生死根栽也又五蘊身存尚不知百骸散後何處覓近日有者一向祇恁坐地初時惺惺地餉間便瞌睡十箇九箇

坐地睡著苦苦不會做功夫那裏硬坐要會不是此理怎生見得丹霞豎起拂子龐居士舉起槌子丹霞擲下拂子居士放下槌子又云昨日公案作麼生丹霞放身臥居士便出去此豈不是真實知音豈容你亂說容你下注脚又嵒頭道夫沙門者一一從自己胸襟流出蓋天蓋地始得那裏是靜坐思量來先師坐時有坐時道理立時有立時道理豈不見投子問翠微西來密旨可得聞乎翠微竚立顧視投子云未曉玄言乞師再指翠微云更要第二杓惡水潑在投

子便悟諸人不得受用在十二時中蹉過多少好事  
所以我道祖師真實好知音良久又道祖師之道如  
青天白日相似爲什麼有人迷路久立  
師云你諸人會不得過在何處你都盧是不會根本  
是不會了更求覓會處古人道莫棄者邊着那邊若  
如此轉難會也向你道根本是不會何不恁麼看如  
法眼行脚時地藏問何往法曰行脚去曰還會行脚  
事麼曰不會曰要知行脚事不會者是法眼從此省  
悟我問你既不會又如何是得須有入路方知不是  
強會底事巧會千般你根本不會了堪作何用須着

用意究你看不會從何處得來你要知麼你者不會  
本無來處旣無來處此不會却如何及乎明得者不會  
會無去處恁麼地看時你管取須明得祇被你不解  
做佛法中人一向祇在世間用心未曾片時究此事  
如何得便會去及乎被人問着胡道亂說不是恁麼  
事舊日曾聞一人老僧說香林和尚見僧來曰你說  
得不無你你下階兩三步早不恁麼也莫亂說好你  
看古人根窮人是如何將爲事佛法無虛棄底道理  
會取會取环重

師云雲門大師曰汝若實未構且順朱識取叢林中

叅學人亦須順理而進不敢望有超過底事大凡今之學人事作一邊理作一邊所以致令身心不得安樂何不且教事常順理去未說無始劫來事祇據一念入母胎頓變根身器界自是已來莫不皆是事一報身中種種何嘗有一法不是事者如今如何消遣此箇事得順理去且事有形段理無相狀古人一得其理了事便如理融通去豈不見昔人聞板鳴乃撫掌大笑曰我會也我會也此豈不是順理而學何不去十二時中恁地觀究做得者般功夫久久成熟自然與理相應祖師道要急相應唯言不二不祇說

了便了要得相應始得鴻山道事理不二真佛如多見不能順朱把來一時顛倒了空理會古人言語公案差別問難節記門庭以爲叅學苦哉苦哉學道不如此後生兄弟更是不知空腹高心十年五歲過却光陰並無所得無明人我客氣殊不念出家事將來如何去各各究取莫久立

爲李舍人普說師云實無一法爲緣爲對若有一絲頭便是一絲頭你諸人如何見得無一法爲緣爲對底道理若向者裏明得現前何處更有身心可求若實無箇證入處都來祇是生死流注如今問諸人你

現今種種分別念慮作麼生都無法爲緣現前我見  
你你見我作麼生無法爲對道人家須是恁麼翻覆  
體究始得山僧道佛法便是諸上座諸上座便是佛  
法是有語路來體解無語路來體解是有可趣向處  
無可趣向處從上古佛先德現前在此盡大地凡夫  
四生六趣現前在此向者裏直下了得實無一絲毫  
子豈是取一邊捨一邊豈有一段本來事有一分今  
時妄想則爲馳求取捨至今不得現前既有許多流  
轉法可取可棄所以諸佛出世祖師西來使汝尋師  
訪道祖師邊事透不過時直下如銀山鐵壁相似且

如何是銀山鐵壁元來是自家屋裏事思量來者般  
事我未會已前如銀山鐵壁如今會了元來我是鐵  
壁噲鐵壁鐵壁所以道祖師常在世間祇如世間如  
何了先聖道自從認得曹溪路了知生死不相干須  
是你自家踏着始得方知道佛祖當時垂手須一一  
從自己胷中流出自然明得諸聖出世善巧方便祇  
如諸人每日說底話還有方便善巧麼乃至動轉去  
來種種施爲有善巧方便無善巧方便豈不見洞山  
參見雲門門見來便問近離甚處山云查渡者一句  
語如何是會來恁麼說是不會來恁麼說是肯了恁

麼道是未肯了恁麼道雲門又問夏在什麼處山云湖南報慈門云幾時離山云八月二十五門云放你三頓棒洞山一夜不安明日上去問訊云昨日蒙和尚放某甲三頓棒不知過在什麼處門云飯袋子江西湖南便恁麼商量也山於言下見道且有過無過合喫棒不合喫棒卽且置你道者僧悟處是如何古人爲人作麼生或若者裏明得自從無始劫來是實無一絲毫爲解礙方從是出生便了他諸聖行履處未能如此莫道是諸聖行履處十二時中行履處何嘗分明紙爲無始劫來顛倒迷亂六趣何會見還

如蠅子透牕相似不見端師翁有頌云爲愛尋光紙上鑽不能透處幾多難忽然撞着來時路始覺從前被眼瞞如今既在此門中不可中塗困蹠縱然學道得旨後閨閣中物颺不下明得此事還被此事留滯不見道金鎖玄關留不住行於異類且輪迴到得恁麼田地方可爲人師如今去聖時遙人多懈怠尋常說正法像法末法山僧道法無正像末佛法常在世間得時便是正法失時便是像末法諸人決然要辦此事緊要是出生死然本無生死可得何故三際求之不可及先佛道過去心不可得現在心不可得未

來心不可得祇如歷歷分明聽法者是誰是過去耶現在耶未來耶須知是一箇無始時來無知覺者如此看來豈是與一法爲緣爲對如今天下禪僧盡道祇是者箇漢是定有者箇漢是定無者箇漢道橫也是者箇漢豎也是者箇漢也道六十二見諸外道盡從佛法中來所以貧道頃在舒之龍門時常勸人如此做功夫後到褒山亦不忘此旨非時愛與兄弟東說西說喚作非時語緊要處却在當人不見昔日鴻山和尚在百丈作典座一日司馬頭陀問云野狐話作麼生會鴻山撼門扇司馬云是則是大龕生鴻

古尊宿語錄卷第三十三

山曰佛法說什麼龕細你道問他野狐話他却撼門扇且道緊要在什麼處要會麼盡是金毛師子子莫於中路却輪廻久立

金壩居士于玉立施貲刻此  
古尊宿語錄卷第三十三 計字八千二百二  
十六箇該四兩二錢八分  
銀山釋海亮對上元李淵書旌德劉邦承刻  
萬曆丙辰歲冬十月徑山化城寺識

古尊宿語錄卷三十二

外中印味禪院入立

見道禪禪要五十急頭禪會想盡吳金牛列士真  
清白吟詩舊十無量山不言卧裡燃香出味

古尊宿語錄卷第三十四

舒州龍門佛眼和尚語錄

住南康雲居嗣法善悟編

魚籃出家五是

頌古

外道問佛半

杲日連天照有無孰云善逝坐跏趺如今要見當年  
事邪正猶來在半途

世尊陞座文殊白槌

法王法令若爲酬潦倒文殊強出頭負累釋迦猶可  
事至今千古閑啾啾

世尊拈花迦葉微笑

百萬人天望舉揚拈花微笑大乖張幾多業識茫茫  
者問着勞生沸似湯

二祖請達磨安心

若有絲毫付與人可師何得更全身人間天上迷逢  
處八兩元來是半斤

六祖風幡

非風幡動唯心動大海波濶常汹湧魚龍出沒任昇  
沉生死聖凡無別共無別共底怎麼樣祖佛傍觀空

合掌

正言卷之二十四

國師三喚侍者

潦倒江湖上竿頭事可咍一回浮子動又是上鉤來

百丈野鴨子

草裏尋常萬萬千報云飛去豈徒然鼻頭是甚閑皮  
草十字縱橫一任穿

百丈歸與同事坐次忽然哭事問曰憶父母耶  
丈云無事曰被人罵耶丈云無事曰哭作什麼

丈云問取和尚事往問大師大師曰你去問取  
他事回至寮中見百丈呵呵大笑事曰適來爲  
什麼哭而今爲什麼却笑丈曰適來哭而今笑

同事惘然

一回思想一傷神不覺顰然笑轉新雲在嶺頭閑不  
徹水流澗下太忙生事去問大師大師曰你去問  
馬祖陞堂百丈捲席馬祖云無事曰突厥十越  
挂得帆來遇便風須臾千里到家鄉臨門上岸逢妻  
子歡喜情懷不可當

百丈再參馬祖張士豈對答鼻頭長甚問  
挂拂遭呵耳便聾衲僧奚若驗宗風金剛腦後抽生  
鐵華岳三峯倒卓空

黃蘖一日問百丈曰和尚在大師處有甚奇特

言句乞師不恠丈遂舉再參馬祖因緣乃曰我  
當時被大師一喝直得三日耳聾黃蘖不覺縮  
項吐舌丈曰子已後莫承嗣馬祖庶孽曰不然  
今因和尚得見馬祖大機大用要且不識馬祖  
若承嗣馬祖恐已後喪我兒孫丈曰如是如是  
家肥生孝子國霸有謀臣拳頭劈口槌未到無兒孫  
百丈開田說大義

開田說大義後人莫容易百丈總持門淡而還有味  
黃蘖問百丈從上宗乘苗裔此間如何商量百  
丈默然蘖曰教後人如何委悉丈云我將謂你

是箇人便起去孽隨後入方丈曰某甲得得而來祇要箇印信足矣丈曰若恁麼他後不得辜負老僧

打麵還他州土麥唱歌須是帝鄉人現成財本成家者多見飢寒在子孫

百丈一日問黃蘖何處去來孽曰大雄山下採菌子來丈曰還見大蟲麼孽便作虎聲丈便抽斧作斫勢孽約住便與一掌丈便休至晚上堂謂衆曰大雄山下有一虎汝等諸人好看老漢今日親遭一口

大雄山下斑斑虎觸差傷人誰敢顧親遭一口老婆心何曾用着腰間斧  
百丈問黃蘖甚處來孽云開田來丈云辛苦不易孽云隨衆作務丈云有勞道用孽云爭敢辭勞丈云開得多少田孽遂饅地數下丈便喝孽掩耳而去

相見言談理不虧等閑轉面便相輝畢竟水須朝海去到頭雲定覓山歸

黃蘖示衆汝等諸人盡是噇酒糟漢

大唐國裏無禪師不許會今祇許知着肉汗衫如脫

了方知棒喝詭愚癡

黃蘖一日在南泉位中坐南泉遂問長老是甚  
年中行道蘖云威音王佛已前泉云猶是王老  
師孫在蘖遂歸本位坐彼此老來誰記得人前各自強惺惺一坑未免俱埋  
却幾個如今眼子青

南泉問黃蘖定慧等學明見佛性此理如何蘖  
云某甲十二時中不依倚一物泉云莫是長老  
見處麼蘖云不敢泉云漿水錢且置草鞋錢教  
什麼人還蘖不對

問荅分明是切磋幾人於此見設訛少年俱決龍蛇  
陣潦倒同吟稚子歌

南泉門送黃蘖泉曰如許大身材戴柳子大笠  
子蘖云三千大千世界總在裏許泉曰王老師  
吓黃蘖戴笠子便行

相見錦江頭相携上酒樓會醫還少病知分不多愁  
百丈問南泉何處來泉曰江西來丈曰還將得  
馬師真來麼泉曰祇這是丈曰背後底吓泉拂  
袖便出丈一會丈手立泉云太俗坐曾合掌

師不作賤今不作貴

南泉坐次一僧叉手而立泉云太俗生僧合掌

泉云太僧生僧無對

南北東西無不利令人深愛老南泉眉毛撕繫如相似鼻孔遼天不着穿

洞山謂雲居云昔南泉問座主講何經論主云彌勒下生經泉云彌勒幾時下生主云現在天宮當來下生泉云天上無彌勒地下無彌勒時雲居遂問洞山祇如天上無彌勒地下無彌勒未審誰與他安名着字洞山直得禪床震動乃

曰膺闍黎

禪床驚震被搽糊惹得兒孫不丈夫拄杖劈頭連打出也教知道赤鬚胡

南泉示衆云馬大師道卽心卽佛又云非心非

佛老僧却不恁麼不是心不是佛不是物恁麼道還有過也無趙州出禮拜歸衆僧問趙州適來禮拜歸衆意作麼生州云却問取和尚僧上正音問南泉適來諗上座意作麼生泉云他却領得

老僧意旨

祖佛場中不展戈後人剛地起設訛道泰不傳天子

令時清休唱太平歌人間興亡事

南泉斬猫兒

五色狸奴盡力爭及乎按劔總生盲分身兩處重相爲直得悲風動地生

晚趙州從外歸泉舉前話問之州脫草鞋戴頭上而出泉云子適來若在卽救得猫兒

安國安家不在兵魯連一箭亦多情三千劔客今何在獨許莊周致太平

南泉歸宗麻谷三人去禮忠國師

同氣相求事可論一回見面一歡情兩行何處閑文

字一隊誰家好弟兄

大隋益龜

骨裏皮兮皮裏骨大隋老子無窠窟上士聞之笑未休中流特地生疑惑

俱胝豎指

老大宗師豎指頭一生用得最風流玄沙拗折無人會年來年去冷颼颼

德山參見龍潭吹紙燭

黃金爲骨玉爲稜莫把他家此日尋多少從來悟心匠盡將底事繼威音

喚

魯祖面壁

池陽何處得捫摸後代商量苦也無古人剛地成多  
事敢問如今會也無

雪峯示衆云望州亭與上座相見了也烏石嶺  
與上座相見了也僧堂前與上座相見了也  
密密堂堂早二三本來無物更何堪癡人見了生歡  
喜作者相逢滿面慙

米和尚令僧問仰山今時人還假悟也無山云  
悟卽不無爭柰落在第二頭米聞深肯之

悟人千箇道無憂肯信遭他第二頭急寢山花寒食

後夕陽西去水東流

金牛和尚每至齋時自將飯於僧堂前作舞呵  
呵大笑云菩薩子喫飯來

長連床上狐屎尿三聖堂前狗吠春跳出金牛窠窟  
子月明照見夜行人

玄沙三種病人

玄沙三種病人有理不在高聲引得香嚴老子走來  
樹上懸身

破竈墮和尚居嵩嶽山塢有一廟甚靈廟中唯  
安一竈遠近祭祀不歇烹殺物命甚多師一日

領侍者入廟以拄杖敲竈數下云汝本磚瓦泥土合成靈從何來聖從何起又敲數下竈乃隳破墮落師云破也墮也須臾有一青衣峩冠忽然設拜師前師云是什麼人神云我本廟神久受業報今日蒙和尚說無生法忍遂得生天特來禮謝師曰是汝本有之性非吾強言神再禮而沒

禍福威嚴不自靈殘盃冷芻享何人一從去後無消息野老猶敲祭鼓聲

大眾遂曰如其等久在和尚左右不蒙示誨適

來竈神說何法便得解脫師曰我也別無道理祇向伊道元是一堆泥土合成靈從何來聖從何起你等諸人何不禮拜衆遂作禮師云破也墮也大眾一時悟入

春寒料峭凍殺年少切忌參商別無奇妙低頭侍奉歡喜問訊佛法商量傷子性命

趙州勘婆

趙州言勘破笑殺老禪和院主鬚眉落南泉打粥鍋趙州勘破却成罪過大地衆生千箇萬箇

百丈野狐

醉眠醒臥不歸家一身流落在天涯祖佛位中留不住夜來依舊宿蘆花

黃蘖問百丈古人錯答一轉話墮在野狐身今人轉轉不錯時如何丈曰近前來向汝道蘖近前打師一掌丈呵呵大笑云將謂胡鬚赤更有赤鬚胡

一問當機絕異同定乾坤箭驗勲功轟轟一掌胲腮下笑殺雄山者老翁

司馬頭陀問鴻山百丈野狐話你作麼生會鴻山以手撼門扇三下司馬云太龐生鴻山云佛

法說甚

底細

春至是花開水顏安在哉可伶園裏色不入鏡中來靈雲見桃花

春來依舊一枝枝同地同天道不疑未徹之言人莫問令余特地笑嘻嘻

臨濟參黃蘖首座令問如何是佛法的大意三度問三度被打擘開華岳連天色放出黃河到海聲瞎驢死後蒿枝折大地如今有幾人

雲門三頓棒

奉君三頓曲周遮屈辱雲門老作家渡水穿雲五湖  
客欲將何物當生涯

雲門餌餅

雲門答餌餅言前句後領驢鞍爺下領到了終不省  
塞却你咽喉把將餌餅來速道速道

剝賓國王自將劔至師子尊者處問師得蘊空  
否尊者云已得王云既得蘊空可施我頭否尊  
者云身非我有豈況於頭王卽斬之白乳高數  
丈王臂遂落

楊子江頭楊柳春楊花愁殺渡頭人一聲殘笛離亭

晚君向瀟湘我向秦

仰山揷鉢

數目分明舉卽難衲僧無不膽毛寒須知更有壺中  
路但向須彌頂外看

長慶萬象之中獨露身

萬象之中獨露身一回相見一回嗔東西南北吾皇  
化莫向江頭苦問津

雪峯鰲山成道

鰲山成道足人傳莫是從前話不圓頗有玄沙知始  
未徧身紅爛在漁船

子胡狗

老大宗師沒巴鼻養狗之緣太兒戲奪牌禪客如到來鉛刀爭及吹毛利

鳥窠吹布毛

欲求佛法往南方老大宗師爲舉揚山花滿地雖狼藉一陣風來一陣香

玄沙虎

宗師方便太慈悲是汝之言實古錐萬里神光騰頂後肯將生死嚇愚痴

五浪參石頭

在途在舍若爲酬莫把先師一例求雄雄宇宙如王

者未免半邊無觸體

藥山一句子

犢牛生子頗相諳兩眼通紅色似藍把火照來無覓處大家普請一時參

趙州喫茶

趙州一椀茶驗盡當行家一期雖似好爭免事如麻盤山臨入滅垂示云還有人邈得吾真麼衆人競寫呈師師皆不納時普化出衆云某甲邈得山云何不呈似老僧看普化乃打筋斗而出

師真醜拙不堪呈用盡身心笑殺人彼中莫覓絲頭  
意白鼻崑崙賀新正

女子出定

出得出出不得初不離是定聖者起凡情凡人而乃聖  
倒用與橫拈扶邪及顯正春雨春風竹戶涼落花啼  
鳥千峯靜

良遂叅見麻谷平山以蘊才大興來無  
平生心膽向人傾到此門中有幾人別後都城舊知  
已暖煙斜日又黃昏

黃龍三關

佛手驢脚生緣黃龍元無此語直饒恁麼知之我儂  
亦未相許奉報四海禪人第一不得錯舉

晦堂拳頭

着眼看來寧免瞎全身何用佩金魚黃龍意氣雄豪  
甚祇爲他家不識書

五祖老和尚凡見僧來便云屈屈僧云屈作什  
麼師云如今不屈更待何時

盡力柰何按牛頭喫草若無錦繡文難以論嘉藻  
又每見僧來展手問云何故喫作手  
何故喫作手衲僧難開口擬議自顛預可怜大蒙手

又每遇僧請益祇云無這閑工夫

彼此且無相負累行人無不失鉤錐雖然不瞎衆生  
眼也好拳頭劈口槌

室中垂示

師云不負平生眼目還知龍門老爲人處麼若知得  
終不相辜負若不知實無爲人底道理師云上座未  
來此間時無一人上座旣來此間後有一人上座祇  
是一人上座爲什麼成有成無師云正恁麼時作麼  
生辦師云得底人還具四大五蘊麼師云真佛住在  
何處師云盡十方世界是你自己折旋俯仰復是何  
人師云古人道無情有佛性師云有情具覺知可容  
知有佛性無情無覺知若爲知有佛性師云昨夜山  
前虎咬大蟲師云無目仙人能揣骨旣是無目將什  
麼辨貴賤師從東過西顧謂衆曰是是復從西過東  
顧謂衆曰是不是遂歸位立曰適來猶記得舉魯  
祖凡見人來便面壁而坐不知後來有甚人會得師  
云離却三界還見香臺麼師云有情說法易見無情  
說法難聞祇如無情說法什麼人得聞師云鴻山接  
仰山師云現今是箇什麼何不猛會取師云有人問  
你隨問便答無人問你時作麼生道師云芥子納須

彌且問你諸人卽今在芥子外芥子內若道在芥子外如何納得須彌若道在芥子內許多大身材如何却在芥子內師云隔宿不問道今朝事作麼生師云山僧問你諸人尋常一件事諸人舊時曾到處忽然思量着一一在目前爲將眼見耶將心見耶若道將眼見諸人思量舊時到處如何是眼見若道是心見心豈有見耶現今日前燈籠露柱是心見耶是眼見耶世尊道從本已來非心非眼且道是箇什麼舉古人道一堆火兩人坐我是你你是我的師云你自是你向火我自是我向火爲什麼却道我是你你是我的師

云無舌人解說說則說了也師却吐舌云爭柰者一片子何師云明來暗謝智起惑亡正當明時暗向什麼處去祖師道祇者明便是暗明暗覩體不可得師云黑地裏行時爲什麼脚高脚低師云古人道世間法便是出世間法露柱是世間法如何明得知是出世間法去師云一切衆生眼見耳聞先聖去者裏有箇指示人處道卽此見聞非見聞師云諸人正當見聞時作麼生見得非見聞師云忽然被人稱名道姓喚你一聲時你去者裏還入得麼師云山僧與諸人總在者裏其間有了者不了者作麼生辨得者箇是

了者這箇是不了者作麼生辨師云諸人還會古人說底話麼那箇是古人作麼生是說底話若不恁麼明得祖教佛教俱爲剩語作麼生是古人說底話師云十二時中作麼生是你相應底句師云不是山僧瞞你却是你瞞我作麼生是你瞞我處師云中夜間忽然會得去今朝起來所見所聞別也作麼生是別處師云此事易見難曉你等諸人還見狗子麼見生客則吠見熟客則搖尾且道是一耶是二耶若道是一吠則咬人搖尾則求食若道二來生也是客熟也是客所以道易見難曉須是向不一不二處會取山

僧不誑諱你子細檢點看師云山僧齋時見箇蠣蛤子在聖僧鼻孔裏出來入去得大無畏你諸人十二時中出來入去在什麼處師云古來有箇禪客依栖一人尊宿每日上去問訊纔見來便道且去未在如是數年忽一日省得便上去宿纔見來便云懶是也師云作麼生見得便知道是也師云不重久習不輕初學久習之人有何過不重初學之人有何能不輕正當撞着此二人相見時如何師云諸人大似開眼屎床還見開眼處麼師云須得作衲僧家說話且道衲僧家如何說話師云你上來時早是分外也更口

吧吧堪作什麼師云曹溪大師道繁興永處那伽定祖師在你背後還見麼

## 垂代

師一日問侍者三人中那箇不在數代云和尚問不着又云某甲祇得纖口又云慚愧且得和尚委悉因病臂示衆云我一隻左臂因你諸人教我動不得因你諸人教我受無限辛苦代云和尚要如此分疎作麼又云不敢辜負和尚一隻左臂又云學人聞得不安不樂又云此是和尚成褫某甲恐某甲不到者田地舉古人云飛猿嶺峻你好看問僧你如何代

云恁麼則不去也又云爲什麼不去代云祇者便是飛猿嶺問大庾嶺頭提不起時如何代云你却會得好又云你適來披袈裟來麼據款結案又云依樣畫葫蘆聞書閭門開云無風自動好與三十棒舉古云泉眼不通被沙礙道眼不通被什麼礙古云被眼礙問僧祇如眼如何礙代云早知燈是火飯熟已多時問僧你許多時在什麼處安身立命代云少人知問南泉牽牛巡堂如何代云你尋常東行西行有佛法道理無佛法道理又云錯行此路問高麗淨餅爲什麼在者裏代云非但在者裏舉龐居士問馬大師不

與萬法爲侶者是甚麼人代云某甲已答和尚了也  
一日聞茶版聲又聞浴鼓聲問僧云赴那處卽是代  
云聞時雖普不妨應處成偏應處雖偏不礙聞時常  
普問僧如鏡鑄像像成後鏡光向什麼處去代云老  
僧出家三十年也問孤燈獨照時如何代云露柱證  
明問如何是你受胎處代云和尚甚處去來問念念  
攀緣心心永寂時如何代云復有何事問我與釋迦  
老子同參釋迦老子具三十二相八十種好如何說  
同參底事代云莫來汚我耳目問久嚮千佛到來爲  
什麼一佛也不見代云已見千佛問識情不到處如

何代云大蟲看水磨問識情不到處還聞雨聲麼代  
云將爲某甲落他情識裏問大安樂底人還見有春  
夏秋冬麼代云若不恁麼爭喚作大安樂底人問衲  
僧家如何商量代云寒時言寒熱時言熱問如何是  
古人田地代云豈有異耶問飯袋子如何代云正道  
着因遊白蓮峯至半山亭有僧後到云和尚尚在這  
裏師云我到了來也僧無語代云也是齋後鐘呂少  
馮入室問和尚有何提誨師云若有提誨卽埋沒足  
下又問請和尚徑直指示師云太透曲生問有一物  
上挂天下挂地黑似漆常在動用中動用中收不得

過在什麼處代云有什麼過謂僧云我爲你着盡氣力如何着力代云早朝有粥齋時有飯問會佛法人爲什麼病代云也知和尚心切師插一隻火筋在爐中云此意如何代云頂門上着一隻金剛箭又云刺破你眼睛穿過你心肝又云莫向虛空裏釘橛有一屠兒身上常出乳香舍利此意如何代云恐人不信又問別底屠兒爲甚却無代云他得大闡提問虛空還有變異也無代云青黃赤白長短大小師豎起拂子問僧從什麼處得來代云也只是某甲底夢中僧問和尚因什麼得悟代云莫搽糊我見畫兔子相咬

師云咬殺也又云我也知你親

示衆云會佛法底人不得龍門飯喫不會佛法底人亦不得龍門飯喫總不恁麼人亦不得龍門飯喫且道什麼人得喫代云無慙媿底人又云似我者得喫遊山次問僧竹密不妨流水過如何代云不許夜行投明須到問僧癩狗爲什麼無毛代云已被和尚道了也又云直得恁麼因僧問病師云我身在這裏爲什麼心不在這裏代云身在這裏你疑箇什麼又云洎合空過一生問亡僧遷化向什麼處去代云你問我又云深領和尚一問一日喫粥了白衆云許多人

喫粥也無一人構得便起去舉古德一日不赴堂侍者白云請和尚赴堂德云我今日在莊裏喫油糍來者云和尚不會出入爲什麼却道在莊裏喫油糍來德云你但去問取莊主者纔出莊主歸謝和尚莊中喫油糍代云事實如此聞鼯鼠聲侍僧問古人道卽此物非他物意旨如何師云這老漢不識好惡與人說作什麼又云你尋常寮舍裏東語西話還有吉凶麼問廣額屠兒手中屠刀如何放下代云不須放也問面前是什麼代云無物問六祖不識字爲什麼墜腰石上題云龍朔二年老盧記代云更須子細問

侍僧汝恁麼供養老僧老僧將什麼報答你代云謝和尚報答因看月問侍僧那一半在什麼處去代以手指月問大地衆生如何度得去代云有箇度處僧云和尚如何度師云莫管他因僧亡問衆云齋後燒你也你如何代云事不徒然又云非但某甲又云深領此問師謂侍僧云我尋常向你說却成罪過代云也知和尚小心呂少馮再至褒禪見師師尋常以六隻骰子示禪人遂將三隻令侍者送與少馮仍傳語云此是老僧平生用不盡底少馮接得復令回語云謝和尚見惠祇得一半在師復令侍者傳語云一半

留與老僧師一日到寶公塔前忽云雲光好法師安  
角在頭上既是雲光法師爲什麼安角在頭上代云  
陋巷不騎金色馬回來却着破襯衫師在方丈坐見  
僧上來師云入室未到你次在代云恁麼則某甲伏  
惟謹退師因喫藥次問僧云適來胷中似有一物且  
道是何之物代云肺氣又云猶有者箇在又云者箇  
是什麼乃驟步而去師謂僧云開鋪席了也東買西  
賣僧云好茶師云賤貨自收師問僧你忽然死去時  
如何僧無語師呵呵大笑僧問如何是聯兆未生時  
事師云你何不早問師一日謂僧云扶不起設使一

萬人也扶不起良久云祇有一人扶得起僧云未審  
是什麼人師云無力者師問僧燈籠什麼處得來代  
云驗在目前問僧忽遇虎狼刀劍時如何代云是虎  
狼刀劍問僧子已後如何代云一似今日問僧從緣  
得者永無退失者裏見得自己亦是生冤家還會麼  
僧云自己亦不見時如何師云時教阿誰敘僧無語  
師代云孟春猶寒師舉僧問雪峯知有向上事始有  
語話分時如何峯提起僧手云作麼生僧無語代云  
引得者老和尚到恁麼田地舉僧問法燈百尺竿頭  
如何進步燈云懶問僧下得什麼語代云平地神仙

舉藥山謂高沙彌云見說長安甚鬧高云我國宴然  
師問僧如何是我國代云四五百條花柳巷二三千  
處管絃樓五祖老和尚常展手問人云因何喚作手  
代云瞞我太煞

示禪人心要

不應於無際空中立分限若立無分限是無際空乃  
自負墮所以解空者無空想若人以語言名狀心終  
不得心不以語言名狀心亦不得心語言本是心名  
狀之故不得也無語言本是心不名狀之故不得也  
種種會當皆不與自心契上祖曰默契而已爲若此

道若未達但無妄念爾若人知是妄念作意止之者  
見有妄念故也知有妄念作意觀察令見正理亦見  
有妄念也知妄元是道乃無妄焉故達道者無所得  
也發意求道道卽得之但不別求知無迷妄謂之見  
道近世皆曰無不是道譬如飯籮邊坐說食終不能  
飽爲不親下口也證者絕能所也非別有玄理在尋  
常日用處如見色時是證時聞聲時是證時飲水食  
粥是證時一一絕能所此非久習不假薰煉蓋現成  
之事世人不識名曰流浪故云唯證乃知難可測學  
道者明知有是事何故不得肯而長益信未極疑

未深也唯深與極若信與疑真是事也不解如此返照遂迷亂不知由緒因躡中途能自返省更無第二人也既曰此事又豈更知耶知是妄慮此事則不失也道不止說與示而後顯益體自常露說示者方便道用爾省悟者亦暫時歧路也或因說而證或因示而入或自覺觸以歸終無異事別得至心源而止也人言悟了方修此屬對治門雖然禪門亦許以正知見治之若論當人卽不須若是也佛道長遠久受勤苦乃可得成者綿亘三世凡聖一如故曰佛道長遠不起異見未始遺棄故曰久受勤苦畢竟無別法故

曰乃可得成此大丈夫事人不識問遂依來而答不知乃自問尔欲答誰耶人不識答遂依言起見不知乃自答尔何有旨趣耶故曰總是你好看好看或人曰從上古聖佛祖指示言教流布世間一一分明何故都是自己深負上古先聖苦口垂慈也今對之曰吾順佛祖宗趣尔自負吾不負也若言有所說卽是謗佛祖曰莫作最後斷佛種人若不就已知歸所作皆成造偽縱記得河沙會盡塵墨於已何益故曰將聞持佛佛何不自聞聞外求有相佛與汝不相似尊宿云我今對你一句子亦不難你若一言下薦去猶

較些子若不會老僧却成妄去夫今時學者競以問  
答爲禪宗中關要不知是取捨作想心嗚呼就理就  
事之學蓋是近家語縱有少領覽未可休息豈不聞  
說涅槃之道圖度絕矣直須解自點檢始得人以迷  
心故進道乃來山林中見知識將謂別有一道可令  
人安樂不知返究向來迷處工夫最第一若不及此  
入山林而不返徒爾爲也迷處極易而難入故先德  
曰難信難解又曰此是頓宗說道返照向來已是走  
作語況不爾耶後世遂用此語爲平常無事一味實  
頭此又後學之不明眼食之不審也從上來有二種

方便有真實方便所謂說無有間有善巧方便所謂  
妙應羣機若從真實方便得入不假思量性自神解  
永無有退妙用河沙也若從善巧方便得入得坐披  
衣向後自看始得未足將爲究竟此二種方便皆一  
法也不可須臾有失學者思之雪峯示人曰莫教老  
僧有一句子到你分上若有一句子到你分上堪作  
什麼也此是古人不得已而已後者不了古人意便  
謂自己分上無許多言談所以錯會也今時人多將  
目前鑒覺用爲極則玄沙所以向人道深山迥絕無  
人處你道還有否悟心見性當如雪峯玄沙履實踐

真當如南泉趙州今時學者但以古人方便爲禪道不能與古人同叅也譬如有力人負一百二十斤檣過獨木橋不傾不側何物扶持得如此耶其精緻無雜而已爲道亦尙經中稱譬如師子捉象亦全其力捉兔亦全其力人問全什麼力曰不欺之力若見一毛髮異於心者則自喪身命故達道人無有不是者此力甚大但爲無邊惡覺侵蝕致令力用有虧若無如許多異法異狀異緣異念則隨心轉變自在無礙不求不融道與事會也則何事而非道耶譬如目明

之士入寶聚中而不知方便爲無火燭光明所照也  
入矣卽被觸擊自損身首謂是毒穴非寶聚也有智  
入中持燈燭光照見種種寶任意採擇得寶而出十  
二時中須用智光勿令六塵自傷觸也昔日永首座  
與慈明同辭汾陽而永未盡其妙相從慈明二十年  
終不脫灑一夕圍爐深夜慈明以火筯敲炭曰永首  
座永首座永乃咄之曰野狐精慈明遂指永而謂曰  
訝郎當又恁麼去也永由是方得究竟然畢命相隨  
凡慈明居常差別激問衆不能酬對唯永至慈明卽  
點頭許可此所謂無病之藥學者罕得其要況後世

知見會解之徒何由領是事哉得之當若永發藥當  
若慈明庶幾可也閑中得靜則井邑成山林煩惱卽  
菩提衆生成正覺此語初心學人例道得會得作一  
種平等知見及其放心凡聖依前兩般靜躁殊用明  
知是解會須有安穩處始得一味不可強會近世多  
以問答爲禪家家風不明古人事一向逐末不反可  
怪可怪昔人因迷而問故問處求證入得一言半句  
將爲事究明令徹去不似如今人胡亂問趣口答取  
笑達者十二時中學道無頃刻棄捨此人縱未得入  
念念已是修行也尋常說修行不過三業六根清淨

禪門更不必如是何故禪定之門念念與智波羅蜜  
平等一切處自無過患也久久心地通明之日從前  
並得滿足名一行三昧今時人全無定力復不開智  
眼所有機緣語句祇成諍論生滅心行夫禪學不是  
小小未用超佛越祖得了要超亦不難高郵孫承務  
作書問不落意想不在有無如何則可師答云若問  
如何則不可不問如何亦不可醉客豁醒神珠自瑩  
豈可預爲之計然後領耶第一等靈利人尋討不着  
此一念難得自見見之卽是無別有歧路也尋常例  
以前念爲是以後念照之前後追逐以心用心心則

成境率初已成心境了展轉更不堪如今後念不取  
自無起滅處當處解脫念本不生何更有有無意想  
爲留礙一念悟心成正覺此之謂也念念無生念念  
無相與虛空等觸物遇緣皆佛之妙用無絲頭許對  
待衣珠獨耀十方世界事目擊可了不俟舉意然後  
知之此蓋大丈夫事業不可不成就取欲要是益有  
不是法爲礙欲要得念良由前後皆失念故也晝夜  
不自在要與道合然無少許合處愈急愈不合病在  
取一捨一不善用心不得要術茫然不知日與道遠  
若安坐寧神不勞自辦故達磨大師謂楊衒之曰亦

不捨智而近愚亦不拋迷而就悟達大道今過量通  
佛心今出度不與凡聖同纏超然名之曰祖不着棄  
一邊就一邊當知明明顯著明明作用柱定會取轉  
凡成聖點鐵成金要徑不可不如此究祇恐人兩頭  
走一既不成二又不是不識玄旨徒勞念靜二乘斷  
煩惱得證名爲偏修不若應念化成無上知覺之速  
也修道人若遇煩惱起時如何古人云但以正知見  
治之余則不然祇以煩惱治之如此看來卽不見有  
煩惱也何故煩惱不可更治煩惱如火不更燒火水  
更不濕水體性一同無可得露現此了煩惱本空不

着除遣若起智斷治捺伏却成別用心有對待被他  
二境回換縱得亦迂曲有分限須行徑直路爲上古  
人云劫火曾將無氣吹不勞功力當時萎此之謂也  
有時靜坐則心念馳散或然臨事又全失却都緣未  
得親證落二落三致有錯謬展轉之失古人云動靜  
不二眞妄不二維摩明一切法皆入不二門若領此  
要萬動自寂滅也且如眼不至色色不至眼聲不至  
耳耳不至聲法法皆爾元是自心功德藏無可得取  
捨契者何往不利此正是那伽大定也今生出來自  
肯學道者蓋夙生曾種善根素有根本便解發心亦

解疑着就已尋究又煩惱障薄有因有緣此人易可  
化度若未薰得此心正信不生縱聞之亦不生疑但  
如風過耳勸之又生瞋加誹謗此又何緣得顯露所  
以千人萬人中但一二人而已若自解作活計收拾  
得上生生從此去展轉明利更不退失功德一生勝  
一生入他諸佛閻域常與此事相應人間天上亦祇  
如此設對五欲八風一切境界與理符合不行三塗  
道一味平等正知見復有何事生死不可不畏須了  
此一段死生情偽始得安樂無過身心爲累耳身如  
桎梏當知身去來處心如猿猴當知心起滅處此二

自何處去來起滅則身心圓明內外一如而已且心爲內身則爲外身爲內物爲外國師曰身心一如身外無餘則不見有生死當情可解脫大道也故能令人見聞不得不脫意想不得不息物境不得不融復奚疑哉

三自省察

一是身壽命如白駒過隙何暇閑情妄爲雜事既隆釋種須紹門風諦審先宗是何標格二道業未辦去聖時遙善友師教誠不可捨自生勉勵念報佛恩惟已自知大心莫退三報緣虛幻不可強爲浮世幾何

隨家豐儉苦樂逆順道在其中動靜寒溫自媿自悔誠問話

近代問話多招譏謗益緣不知伸問致疑咨請之意後生相承多用祝賛順時語並非宗乘中建立如古人文若爲得出三界去又問聲色如何透得又問此間宗乘和尚如何言論並是出衆當場決擇近時兄弟進十轉五轉沒巴鼻語或奉在座官員或莊嚴修設檀信俱不是衲僧家氣味又抽身出衆便道數句或時云某甲則不恁麼道又云和尚何不道夫問話者激揚玄極也不在多進語三兩轉而已貴得生人

信不至流蕩取笑俗子也

古尊宿語錄卷第三十四

佛眼禪師語錄序

佛眼老師自得法東山三坐道場二十餘年行祖令  
於淮甸四方衲子雲奔輜湊不到龍岫謂之空回而  
師端居方丈惟以傳道爲任的的示人晨夕無倦昇  
堂入室當陽直指全用大機普說小叅方便開諭巧  
除禪病要使學者頓悟本心大地山河森羅萬象會  
非外物十方諸佛歷代祖師祇是當人心外無法心  
亦無心一道靈光隨處出現自然無法可取無法可  
捨不見一法爲無爲有爲逆爲順不見一法爲內爲  
外爲去爲來能所兩亡千差獨露從前惡覺情見妄  
想塵勞當體化爲微妙三昧塵塵刹刹情與無情皆  
是自己眞實本體之所建立若到這裏穩密田地便  
可縱橫變化任運施爲於不二法中現作無量差別  
境界使人於千頭百面處見得根本毫髮不移便迺  
不爲萬境回換獨出獨入透脫自由如是神通錄中  
具載言言皆正令句句盡圓宗雖然鏤板示人切忌  
喚作言句若人開卷洞見指歸當知佛眼禪師至今  
不曾遷化宣和七年八月上休日遂寧馮穀謹敘

宋故和州褒山佛眼禪師塔銘

宣教郎前管句西京嵩山崇福宮李彌遜述  
江淮之南有大禪師號曰佛眼道行聞于朝勅居和  
州之褒山踰年以疾辭歸隱蔣山之東堂遠近奔湊  
執弟子禮以求法者不知幾何人名山大刹馳使延  
請者方來而未已也宣和二年冬至之前一日飯食  
訖整衣趺坐合掌加額怡然而逝其徒哀慕如亡津  
梁如失舟楫莫知攸濟嗣法兄佛果大師克勤狀師  
之行且謂彌遜曰師之於公聞風而悅一言而契今  
其逝公實見之知師莫若公是宜爲銘乃序而銘云

師姓李氏名清遠蜀之臨邛人捨家十四受具嘗依  
毗尼師究其說因讀法華經至是法非思量分別之  
所能解持以問講師莫能對乃曰義學名相非所以  
了生死大事遂捐舊習南遊江淮間徧歷禪席聞舒  
州太平演道者爲世第一流宗師徑造其室恭事勤  
請既久益堅深奇之謂可以弘持法忍壁立不少  
假與其深造師七年未嘗妄發一語一日有所契洞  
徹超詣機辯峻捷莫當其鋒自是釋子爭歸之而師  
益靜默自晦不自爲得隱居四面山大中庵屬天下  
新崇寧萬壽寺方擇人以處舒守王公渙之迎師住

持師輒引去會龍門虛席遂補處焉居十有二年遷住褒禪師三領名刹所至莫不興起其在龍門道望尤振四方學者皆曰吾必師龍門由是雲集至居無所容師不起于座而化湫隘爲巨刹壯者効筋力智者授軌度富者施貲財初不斬也師嚴正靜重澹泊寡言笑動有矩則至出語和擇中節人服膺之其爲教則簡易深密絕蹊徑離文字不滯於空無汗漫之說不以見聞言語辯博爲事使人洞真源履實際非大有所契證不妄許可平居以道自任不從事於務營自長老坦端居方丈傳道而已與士大夫游不爲

勢利屈苟道合則欣然造之不爾雖過門或不得見公卿大人高之樞密鄧公洵武聞其風奏錫紫衣師名司諫陳公瓘見所傳法語歎曰諸佛心宗衆生性海遠公涵泳深矣皆未識師也況其親炙者乎與佛果佛鑑同門莫逆道價相尚世稱東山二勤一遠云嘗宗百門義著圓融禮文又撫楞嚴法華著普門禮字並行于世其叅學得法者無慮數十人士珪善悟爲之首而宿松無着道人李法慧頗臻其奧師壽五十有四僧臘四十將逝謂其徒曰諸方老宿必留偈辭世世可辭耶且將安往逮終無一言初在龍門作

洪武

靈光臺以會葬苾薦之火化者且自爲志曰余他日亦藏于此後門人苗骨以歸龍門龍門之人悲且喜奉之如生以宣和三年正月壬寅塔成銘曰

大智唯心	無南北祖	一離其源	遂開牖戶
守玄尚同	執解隨趣	岐行汎流	旣倒莫遡
洪融混合	演得其醇	師則嗣之	道益以尊
如收全潮	衆波莫分	如舉大地	萬有以陳
用晦而明	厥問四馳	覺迷解繆	遠邇是依
用捨孰測	動言有規	嚴以治已	夷以示機
端居叢林	唯道是則	化行事修	不識靜默

大興龍門 蠱壞以飾 洞明真源 深履實際  
圓融普門 並照兼利 最後說法 不立一偈  
嗚呼師乎 勸識其歸 淵澄月現 舟行岸移  
於一舉手 示大慈悲 元珠在前 罔象莫窺  
後學誰師 靈光之碑

福州鼓山白雲峯湧泉禪院住持嗣法士珪重勘

金壇居士于玉立施賈刻此  
古尊宿語錄卷第三十四 計字一萬一千四  
百六十箇該銀五兩九錢六分  
銀山釋海亮對上元李淵書旌德劉邦瀛刻  
萬曆丁巳歲春三月徑山化城寺識

蘇州天山白雲寺西泉軒刻印林編道士玄重譔

鉢學藏印

靈光之印

外一舉手

示大慈悲

示參立誦

圓渠真

卽智禪子

尊端其韻

識登良興

舟音教

圓輪普門

並耶兼味

景妙鑑志

不立一理

大興龍門

靈東以潤

臥即真無

黑風寶

古尊宿語錄卷之三十五

大隨開山神照禪師語錄

西蜀沙門元德重編

上堂云你不見道一塵含法界所以道有一智人破塵出經卷量等三千大千世界你欲破不破我今舉起大家求此事三千世界收在一微塵四大海水歸一滴須彌納芥子中若求自己祇在一毫毛你若一毫毛處見得三千大千總成經卷祇是自己動這箇境界不得所以真境不現說什麼纖毫覺處總是假刀避箭懼境藏形你喚這箇作什麼兄弟如石壓草

相似或然拈却石依舊習氣祇在須是隨處了却始得與境爲主免塵境使喚始得大難大難千難萬難祇是殼解他後銜鐵負鞍阿誰苦纔有些子覺觸處便擬望與人爲師大錯須說凡了却凡須說聖了却聖舉一例諸無非恁麼不易不易珍重珍重下座問如何是大隨一面事師云無東西南北問如何是生死中事師云水上浮漚內外不見問如何是中理一句師云表裏不從進云師決志事如何師云言下知音問如何是道用心處師云莫自謾問陀那微細識到此如何分師云你眼祇解觀色還解聽聲否問萬

法歸一一歸何處師云萬法元不歸問六國未寧時如何師云臣灰功進云直得君臣道合時如何師云不見有君臣問如何是自在師云不自在進云不在時如何師云却自在問中雪瑤堦時如何師云不厭世境問曹溪一路事如何師云老僧道如不淨坑進云何以如此師云佛祖兩路了不相干問久處寒巖何以日不照師云不照寒巖寒巖終不出來就你日光問離光影如何是師性師云和光吐出進云莫鬼語師便打問如何是最初一句師云是末是本問如何是大隨境師云不似學人進云何故不道師云

不然問如何是最初處師云莫妄想問隱隱不停波時如何師云敬禮常住三寶進云息浪停波爲什麼沙石轉多師云爲你斷伊問學人祇如浮雲以鏡捉光何處安排師云與雲爲主問寸草未生時如何師云老僧無米喫終不下大隨山問祖意教意是同是別師云不究始不顧末問路逢古佛時如何師云你或逢駝驢象馬喚作什麼師云夫上代諸德莫非求實不自瞞昧豈比飛蛾投火自傷自壞他明白了被生死輪迴拘障不得所以識不能識智不能知不聞道釋迦掩室淨名杜口須菩提無說而說釋梵絕聽

而聽此事大難大難珍重

上堂問萬法從心起未審心從何起師云石牛沿江走水底火燒天問如何是大隨山師云耳不聞眼不見進云如何是山中人師云千人衆裏萬人衆裏不向一人不背一人問掘一丈見一丈空將一丈土填一丈空未審空歸何處師云莫將這箇道理爲佛法出去出去問佛法遍一切處未審敎學人什麼處駐足師云大海從魚躍長空任鳥飛問撲碎驪龍珠請師明活寶師云明活寶且置作麼生是你撲碎底珠僧無語問法報化三身佛亦非說如何是本來身師

云海底如意珠始終無不應問如何是大人相師云  
肚上不帖膀師問僧向什麼處去僧云西山住庵去  
我向東山喚汝汝便來得麼僧云不然師云汝住庵去  
未得問生死到來時如何師云遇茶喫茶遇飯喫飯  
進云誰受供養師云合取鉢盂師庵側有一龜僧問  
一切衆生皮裏骨這箇衆生爲什麼骨裏皮師遂拈  
草履向龜邊著復云會麼僧無語問如何是諸佛法  
要師舉拂子云會麼僧云不會師云塵尾拂子問如  
何是學人自己師云是我自己進云爲什麼却是和  
尚自己師云是你自己問如何是無縫塔師云高尺

五進云某不會師云鵠峯博問如何是一切智空師  
云心空即是進云更有來時作麼生師云不是空進  
云還稱向上事也無師云不隈問和尚百年後付法  
與何人師云露柱火爐進云還受也無師云火爐露  
柱有一行者領衆到師處師問云叅得底人喚東作  
什麼對云不可喚作東師咄云是驢漢又喚作什麼  
行者無語衆皆散問但有一法耳不聞眼不見皆是  
光影如何是光影中人師咄云莫無禮莫無禮問理  
不言詮時如何師云言詮卽理問如何是和尚家風  
師云赤土畫簸箕進云未審此理如何師云簸箕有

脣米跳不出師問座主講什麼教主云百法論師拈  
桂杖云從何而起主云從緣而起師云苦哉苦哉師  
問僧什麼處去僧云禮普賢去師舉拂子云文殊普  
賢總在這裏僧作圓相拋向背後却展兩手師叫侍  
者云取一帖茶與這僧去問遠聞大隨水到來祇見  
箇漚麻池師云汝祇見漚麻池阿裏見大隨水進云  
如何是大隨水師云苦澀難下觜進云還喫得否師  
云喫著便死師因燒山次見一蛇以杖挑向火中咄  
云這箇形骸猶自不放捨你向這裏死如暗得燈遂  
有僧問正當恁麼時還有罪也無師云石虎叫時山

谷響木人吼處鐵牛驚僧因馳書辯師問曰學人此  
去未審師將何言到彼中師云好爲通達再問臨岐  
叅晚請師垂示師云無事早歸僧從五臺山來師問  
云五臺山何似大隨山僧問云如何是大隨山師云  
老僧耳背高聲問來僧高聲問如何是大隨山師云  
若干山與萬山問魚遊陸地時如何師云拗不曲處  
是閻黎所貴進云却下碧潭時如何師云立足事難  
明師勘僧云從什麼處來僧云從蜀中來師云未入  
蜀時在什麼處盤泊僧云無處所師云莫是處所有  
過耶僧云若有處所鈍置人眼師云天堂地獄有一

坐具分似落坑鼓相似不鼓而自鳴堪作什麼問生死到來時還免得否師云飢時喫飯寒則著衣上堂云夫沙門釋子見有如無始得向一切時中與凡聖等與解脫等方有少許出處若不如此大難大難珍重

上堂問大地及日月時至皆歸盡未曾有一事不被無常吞還有吞不得者也無師云汝喚什麼作無常進云不究竟爲無常師云無常却究竟自是汝不究竟其僧不肯師便打師勘居士云此身是什麼服制十云父母俱亡師云喫茶去居士應諾出去師喚回

咄云你對老僧謾語父母祇在你莫說學無上道自己父母尚乃不知出去出去問如何是玄旨師云直須玄去進云如何是玄中玄師云不返去問古人立雪斷臂爲求何法師云古人不斷臂進云古人斷臂因什麼道却不斷臂師云自是向雪堆裏樂問金雞未啼時如何師云失却威音王進云正當啼時如何師乃笑問柴裏蟲柴裏死水裏蟲合作麼生師云一切尋常問金鴈附書爲什麼不露翼師云不通虛信問道場獻寶誰人能辨師云虛空能辨師忽示微疾不見客時有僧隔簾問咫尺之間爲什麼不相覩師

云如今相覩何不問來僧便問如何是相覩底事師  
云老僧不安有什麼心情對你  
上堂云閑卽遊天寂卽歸地問上無片瓦下無卓錐  
時如何師云汝卽今在什麼處居止問無常迅速不  
與人期忽若到來時如何師云速問速問進云便問  
師云太不道速生問啐啄同時如何瞻覩師云是動  
是靜問出殼時如何師云是末是本又云見麼問普  
雨爲什麼不潤師云普雨問滴水成冰古人爲什麼  
不許師云古人卽如此若是老僧道向虛空裏挂破  
琉璃鉢問旣是師子爲什麼被文殊騎師云調伏自

在問孤巖無紋繡特達事如何師云孤巖有紋繡特  
達事顯現問處水之魚爲什麼渴死師云祇爲魚不  
親下口問父子至親岐路各別時如何師云爲有父  
子俗士施師鉢盂問未施鉢時師用什麼師云使最  
末後者一僧欲下山爲衆化緣辭師師云汝若道得  
一句卽放汝去若未然且歸堂休歇辨取自己事去  
師問盡十方空界是王老師檀越未審化什麼人去  
僧云但請和尚跪頭來便與師道師云汝且辨自己  
事去問毀佛謗僧時如何師云僧有何過佛辜負你  
箇什麼你毀謗他僧無語

上堂云今時沙門向因中辨果果裏辨因始得僧便問有一人不屬因果時如何師近前捉定云我今時沙門向因中辨果果裏辨因汝云一人不屬因果別道別道僧無語師便打出

上堂僧問過去未來卽不問如何是現在師云虛空還著得碨砾石麼問來時無阻隔去時無滯礙正當恁麼乞師一句師云虛空無邊際大海平如掌般若性等等

上堂普告大眾云汝等還知有三處不立質礙有緣二際無分豈知來去三身四智非聖不無八解六通

非凡不有雖則衆生盡有佛性不可將蠢蠢而對佛耶然則高下無偏爭奈途中有異此身難得胎卵易成況是釋子之徒又乃祖宗苗裔三衣覆體囊劫修來四事供須非從今日人前行相總似高僧乃至語言不如俗子稱名便是傳法沙門子細尋思還傳箇什麼一向毀他經教有目如盲純乃謗於祖宗有心也祇如木石不解忖已德行終日恣縱無明以無慚愧之心兀兀何曾覺悟此身若失永劫沉淪非但卻復入人身有福底畜生也難得問孤峯頂上玩月輪時如何師云何不了却孤峰事玩他月輪作什麼進云

豈無內外明徹事耶師云內外明徹事作麼生進云  
無有不照師呵曰這鈍驢也擬學馬走僧無語師復  
云問你諸方雲水闍黎莫道老僧這裏有佛法與你  
諸人說向諸方行脚叅尋知識說箇什麼汝又領箇  
什麼莫道禮三拜後便起近前問若也言下便契時  
猶未是了底人莫向口頭取俊他時人天眼目者非  
是一生兩生修來盡是恒沙劫功成果滿始得如是  
所以向你叢林裏示現下來祇圖你今時人勤苦修  
行祇恐你出家人失却人身莫等閒過日老僧這裏  
有什麼佛法與你諸人說自是你諸人上得山來云

我修行學道是佛向上人且問你佛向下人作什麼  
模樣不可老僧這裏有佛向上人有佛向下人來向  
諸人說邪你若不言我不可知你肚皮裏事也你或  
若問老僧也則隨汝根機與汝說不可教老僧亂道  
得麼祇如老僧行脚時不揀叢林有供養無供養處  
祇要看他眼目稍似根性有些些器量方欲過一夏  
或一冬若是根性鄙劣者三朝兩日便行筭來叅六  
十餘貞大知識有大眼目者那無一二餘者豈有真  
實知見祇是圖你諸人供養欲望福報你又有什麼  
福報與伊不可出家來空趁聚頭喫飯耶雖然如是

四大之身誰免得直饒心超聖境身是凡夫又乃假借增修今時人便去向裏許埋沒却人身諸人莫謾向口頭裏無礙却成謗佛毀法見須實見聞須實聞始得假饒說似斬釘截鐵直須時中不瞞自己始得一車芥子猶未點著在來時便道我是不思議底人縱然除得身邊龕重猶餘微細不知龕重尚乃不知豈可說於解脫之法細中之細佛尚不知微愚凡夫豈能測得但是世間有者並從顛倒所生欲得解脫塵勞無過心中自省摩訶般若是解脫法身子細尋思復是誰有誰無老僧也不是醉凡詐聖祇是習氣

不除上合諸佛心印中合一一切人天下合蠢動含靈師僧家披如來法服須求出離時不待人光陰頃刻珍重珍重

上堂僧問真如法界以三昧爲香花廓周沙界亦同一家龍門爲什麼無宿客灑水爲什麼足蝦墓師云真如法界不以三昧爲香花廓周沙界亦無家目前問者豈不是智淵座主耶主云是師云祇這便是灑水足蝦墓師復云拋却從前活計認本源生涯主無語師云經有經師論有論師律有律師你十二時中合談何事還因箇什麼做得模樣不可三箇作隊五

箇成群趁衣劫食邪到處不免撓他施主坐卧心頭  
難勝於檀越直饒你跨跳向虛空裏行也是國王管  
界不可將持齋奉戒隨時轉一卷經用答四恩三有  
也又爭報答得自是諸人時中事修行到辟支佛地  
方能消得人天供養博地凡夫祇是異俗之形喫了  
不知慚愧空自趁說已是 he 非出言欲斷人命根吐  
氣便作毒蛇之行說著自己三界無過毀挫他人祇  
如蟲蟻若是古佛有此標榜如今欲微倣些些從上  
已來或無此則因何所起如此容縱豈言清德若也  
不達本源未免滴瀝還他改皮換骨泥犁苦海誰人

替得諸人大須竭力不得因循過日學禪學道則不  
無你諸人且道禪有可參道有可學否若言有學者  
無有是處若言無學者亦無有是處不可頓然去也  
因地還從此去直須打底分明了却生死根本縱饒  
異類中受生也終不昧已靈始得四大合成祇是汝  
之窟宅這邊脫去那邊早生那邊脫來這裏早別作  
箇模樣汝不思量看阿那箇是汝本來之身須向彼  
中究取莫謾走南州北州終無了日光陰迅速珍重  
珍重

上堂云此性本來清淨具足萬德但以隨染淨二緣

而有差別故諸聖悟之一向淨用而成覺道凡夫迷之一向染用沒溺輪迴其體不二故般若云無二無二分無別無斷故時僧遂問劫火洞然大千俱壞未審此箇性壞不壞師云壞進云恁麼則隨他去也師云隨他隨他去也僧無語時會中三百餘僧盡皆不肯皆云從上已來祇說不壞之性和尚何故却云壞邪衆各惶然時有一僧上堂頭白師云適來僧問和尚話和尚答他其僧似不肯和尚答底語師云只有此一僧不肯爲如更有人不肯邪僧云只是一僧師云直得三千大千世界人總不肯老僧猶較些些子

非但這一僧其僧後至投子和尚處投子云閻黎近離甚處僧云遠離西川大隨投子問云彼中還有尊宿也無僧云有一禪師住大隨山現有三百餘衆子云有何言句接入試與老僧舉看僧云某甲昨問大隨劫火洞然大千俱壞未審此箇壞不壞子云大隨如何答僧云大隨答道壞僧云某更問恁麼則隨他去也大隨又答道隨他隨他去也子云汝作麼生會大隨語僧云某甲不肯此語子云閻黎早錯了也大隨恁麼道隨他隨他去汝又如何僧云至今未決子遂呼侍者令裝香大展坐具望西川大隨山遙禮三

拜已嘆曰不是大隨和尚伊是箇古佛此乃真善知識汝速往彼懺悔叅取老僧無如是法與汝說速去速去於是僧便回大隨和尚已歸寂復回投子投子和尚亦乃歸寂蜀主賜師紫衣師號并遣內侍朱廷溥侍奉師師不受師復云山僧偶住未經多時隈巒傍水養道存真何人虛譽致令王者如斯異恩謝使遠來勞煩却送還王老僧祇可布衣遮體不須名服向身王恩雖重老朽何堪於是天使遂回奏凡三次送來不受師又云老僧不爲名利來此須要得箇人不可青山白雲中趁你是非將來之世捨一報身後

草也無喫多少金毛師子問著便作驢鳴馬喊諸仁者似老僧行脚時到於諸方多是一千少是七百五百衆或在其中經冬過夏未省時中空過向鴻山會裏做飯七年於洞山會中做柴頭三年重處卽便先去祇是了得自己干他人什麼事如諸佛菩薩盡是勤苦不計劫數捨金輪王寶位及頭目髓腦所愛之物國城妻子不可算數所以始得名爲佛似諸閻黎還曾捨得箇什麼作得箇什麼勤苦便道我會出世間法世間法尚不會些些子境界現前便自張眉怒目消容不得說什麼解脫法長連牀上坐不搖十指

喫他信施了合眼合口便道我修行修道感果如是  
合消得祇是謾自己如百丈和尚置于堂宇祇要辦  
事底人諸閻黎還辦得箇什麼事其中有不動身手  
日消得萬兩黃金若是消得者豈可如此見解不可  
從母腹中來如是邪但會得世間法是則名爲出世  
間法世間法尚乃不會豈況佛法祇如一大藏教盡  
是金口所宣如來祕密汝口裏念將來總成魔語豈  
得了爲什麼不了若了時達磨不從西來也祇如達  
磨未來此土時還有佛法也無又爭得道無譬如人  
有一寶墮在淤泥中勤苦累劫尋求不得或有一人

善知寶所直從泥中指出此寶以示失寶之人失寶  
之人一見便識是我本物了無得失達磨西來亦復  
如是不可祇是老僧是善知識邪遍地衆生總是善  
知識祇是見覺未明不可道伊無也若言有時諸人  
肯禮春蠶之徒作佛麼譬如明珠墮在泥中未遇其  
人豈有出期有此衆生比如無情還同頑物既在三  
衣之下直須親近知識早是幾生修來始得如此不  
可却入輪迴六趣去也若是得自在底人論箇什麼  
餽湯爐炭刀山劍樹四生六道於中如喫美食若未  
得如是便實受此報一失人身載求欲似如今者萬

中無一莫未得謂得未證謂證未聞謂聞自謾自誑失却光陰虛延日月展轉祇是無明擔重乍可爲俗隨所任運遣過時日却乃無業如今作沙門每日有業有什麼業踏底是國王地著底是檀信衣食底是檀信食骨肉是父母之體若也不了將何酬答所以言有業祇如老僧不可是了底人捨此一報身隨業而行誰言定得唯佛與佛乃能知之時有僧問不假言句如何得知師云假言句尚乃不知僧無語禮拜師忽一日上堂衆集定師乃作患風勢告衆曰還有

人醫得老僧口麼衆僧競送藥俗士聞之亦多送藥

師並不受經七日後師自擗口令正復云如許多時鼓這兩片皮至今無人醫得老僧口於是齋前陞座

衆嚴然端坐終

古尊宿語錄卷之三十五

大隨開山神照禪師語錄序

開封郭凝述

元德上人自蜀挈大隨老錄欲罄囊資鏤板於杭廣其說于天下余曰自老盧衣止不傳逮數百年枝分派別披法衣據座唱道者不啻萬數大抵穿鑿破裂隨言取義文生解求其直截根源如古尊宿者固

未易得今欲闡其邪而示之正使知所趨嚮不亦難哉然世必有一覩斯錄然契而獨得者庶乎佛日重輝慧命不絕於是乎書時崇寧四年閏二月十五日也

### 大隨開山神照禪師行狀

師諱法真貌古有威眉垂覆睫嘗聞老宿輩皆稱爲定光佛示蹟於劍南梓州鹽亭縣王氏家生族本簪纓妙齡夙悟決志尋師於慧義寺今護聖寺竹林院是也師圓具後遂遊南方初見藥山道吾雲巖先洞次至嶺外大鴻和尚會下數載食不至充臥不求暖

清苦鍊行履操不群大鴻一見乃深器之一日大鴻問曰闍黎在老僧此中不曾問一轉話師云教某甲向什麼處下口鴻云何不道如何是佛師便作手勢掩鴻口鴻嘆曰子真得其髓從此名傳嶺外聲振寰中爾後聿旋西蜀寄錫於天彭堋口山龍懷寺路傍煎茶普施三年忽一日往後山見一古院號大隨山群峰聳秀澗水清冷中有一樹圍四丈餘根蟠劫石勢聳雲霄南開一門裏面虛通不假斤斧自然一庵師乃居之比夫迦葉三峰維摩丈室不遠大時人皆目之爲木禪庵師居十有餘年影不出山迹不出俗

道德彌著聲聞遐彰知者四方不遠千里櫛足函丈  
朝參暮請虛往實歸時蜀王崇重師名凡三詔不從  
王慕師孤風無由一見遂於光天元年十月十五日  
遣內侍賚紫衣師號寺額等賜師師不受凡三度送  
至師確意却之王愈欽師德再遣使出敕云寡人心  
願此回禪師如准前不受乃卿之罪也回必誅卿天  
使奉聖旨再往師處師亦不受天使懇懃拜禮告云  
禪師此回若更不受君命某必受戮願師慈悲免某  
禍患師不獲已受之師既受已使復告師求回表謝  
恩師云老僧自住山來無紙墨汝隨我口傳語大王

須善保治家治國事無偏傾領取傳言無令忘失欲  
求相見是何年月使依師言回闕奏王王深悅再令  
天使詣山中長生侍奉師師亦不受復云老僧不爲  
名利須得箇人作什麼天使怡然師且權留之師於  
乾德元年己卯七月十五日齋前辟衆端坐而化俗  
壽八十六僧臘六十六時王聞之哀慕師心不勝惄  
怛急宣中書令王宗壽賚香燭備具等到山致祭敕  
葬歸塔神異頗多不可具述補文靈跡靈大塔  
維乾德元年歲次己卯十月乙未朔十五日己酉弟

子拔天佐命忠烈功臣開府儀同三司檢校太尉太子太傅兼中書令食邑五千戶嘉王宗壽謹以香燭茶果之奠致祭于故神照禪師之靈惟靈大教蒼龜釋宗水鑑傳心印以悟道握智珠以談空三乘洞曉其真如四衆頗虔於精妙自攜瓶錫來駐靈山斥鬱嶺之高僧超人天之勝果雲臻士庶渴法如仰於醍醐雨驟緇黃得旨似沾於甘露方化緣而大布何香火而或虧蓋以諸行無常是生滅法爰歸真寂永斷沉淪弟子宗壽幸以孱庸久欽德宇克慕出塵之益將隆離垢之能豈料法舟俄登彼岸今則遷神已上

歸塔行期恨無緇地之能併寫終天之訣敢陳蘋藻式表追攀靈鑑澄明伏惟尚饗



企壇居士于玉立施貲刻此  
古尊宿語錄卷第二十五計字六千八百四十  
三箇該銀三兩伍錢六分  
雙足庵釋真福對金陵丘義明書上元李煥刻  
萬曆丁巳歲春三月徑山化城寺識

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9 10

香

屋之名

左奏鼓鑒靈鑑鑑門外對尚饗

酒客子陳郎無辭故立陪君殊天文

燒火刺蘿蔔

二十一

80 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10